

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

- T 3148 / 0.82

43

山西通志卷第九十五

山西巡撫都察院右副都御史

臣覺羅石麟奉

旨修輯

名宦

十三

朔平府

漢

韓安國梁城安人嘗受韓子襍家說於騶田生所事梁孝王

有忠直聲建元六年爲御史大夫元光元年雁門馬邑豪

聶翁壹因大行王恢言上曰匈奴初和親親信邊可誘以

利陰使聶翁壹爲間亡入匈奴曰吾能斬馬邑令丞吏以

城降財物可盡得單于許之時安國與恢力辯卒從恢議

伏車騎材官三十餘萬匿馬邑旁谷中衛尉李廣爲驍騎

哈佛大學漢和
圖書館珍藏印

山西通志 卷九十五
將軍太僕公孫賀爲輕車將軍大行王恢爲將屯將軍大中大夫李息爲材官將軍御史大夫韓安國爲護軍將軍諸將皆屬護軍約單于入馬邑而漢兵縱發王恢李息李廣別從代主擊其輜重單于入漢長城武州塞覺引兵還漢兵追至塞度弗及罷安國後行丞相事元朔二年卒耿秉字伯初大司馬國子以父任爲郎建初元年拜度遼將軍視事七年匈奴懷其恩信徵爲執金吾章和二年封美陽侯永光三年卒諡曰桓侯

宋漢字仲和以經行著名舉茂才四遷西河太守又爲度遼將軍立名節以威恩著稱拜大中大夫卒策曰宋漢清修雪白正直無邪前在方外仍統軍實懷柔異類莫匪嘉績戎車載戢邊人用寧予錄乃勲引登九列因病退讓守約

彌堅將授三事未克而終朝廷愍悼恒其愴然詩不云乎肇敏戎功用錫爾祉其令將相大夫會葬加賜錢十萬及其在殯以全素絲羔羊之節焉

耿騰字季遇順帝初鮮卑寇緣邊殺代郡太守騰以烏桓校尉率諸郡卒出塞討擊大破之自後頻出輒克獲威振北方遷度遼將軍

馬續字季則七歲能通論語博觀羣籍善九章算術順帝時爲度遼將軍續所在有恩威稱

种暠字景伯洛陽人仲山甫之後也舉孝廉桓帝時遷使匈奴中郎將後寇入并涼二州擢爲度遼將軍暠到營所先宣恩信誘降諸部其有不服然後加討羌虜先時有生見獲質於郡縣者悉遣還之誠心懷撫信賞分明由是羌胡

龜茲莎車烏孫等皆來順服嵩乃去烽燧除候望邊方晏然無警入爲大司農遷司徒卒并涼邊人咸爲發哀匈奴聞嵩卒舉國傷惜單于每入朝賀望見墳墓輒哭泣祭祀李膺字元禮潁川襄城人祖父修爲太尉膺性簡亢無所交接唯以同郡荀淑陳實爲師友舉孝廉累官烏桓校尉以公事免永壽二年鮮卑寇雲中桓帝聞膺能乃復徵爲度遼將軍先是羌虜及䟽勒龜茲數出攻鈔張掖酒泉雲中諸郡百姓屢被其害自膺到邊皆望風懼服先所掠男女悉送還塞下自是之後聲震遠域後再爲司隸校尉獨持風裁以名聲自高士有被其容接者名爲登龍門遭黨事免歸起爲長樂少府陳寶敗復廢張儉事起收捕鈞黨乃詣獄拷死

段穎字紀明武威姑臧人舉孝廉延熹二年遷護羌校尉擊燒當等八種羌破之五年遷并州刺史六年冬復以穎爲護羌校尉擊滇那等羌凡百八十戰悉破之封新豐縣侯後歷太尉司隸校尉楊球奏誅王甫并及穎遂飲鴆卒

皇甫規字威明安定朝那人祖父稜度遼將軍規舉賢良方正對策梁冀忿其刺已以爲下第託疾免歸冀誅拜太山太守延熹四年爲中郎將討破羌零吾後徵拜度遼將軍至營數月上書薦中郎將張奐以自代曰臣聞人無常俗而政有治亂兵無強弱而將有能否伏見中郎將張奐才略兼優宜正元帥以從衆望若猶謂愚臣宜充軍事者願乞冗官以爲奐副朝廷從之以奐代爲度遼將軍規爲使匈奴中郎將及奐遷大司農規復代爲度遼將軍規爲人

多意算自以連在大位欲退身避第數上病不見聽會友人上郡太守王旻喪還規縞素越界到下亭迎之因令客密告并州刺史胡芳言規擅遠軍營公違禁憲當急舉奏芳曰威明欲避第仕塗故激發我耳吾當爲朝廷愛才何能中此子計耶遂無所問及黨事大起天下名賢多見染逮規雖爲名將素譽不高自以西州豪傑耻不得與乃自上言附黨宜坐朝廷知而不問時人以爲規賢在事數歲北邊威服永康元年徵爲尚書後封壽成亭侯邑二百戶讓封不受再轉護羌校尉卒

橋元字公祖梁國睢陽人舉孝廉桓帝末鮮卑南部及高句驪嗣子伯固並畔爲寇鈔四府舉元爲度遼將軍假黃鉞元至鎮休兵養士然後督諸守討擊及伯固等皆破散退

在職三年邊境安靜後遷太尉卒

崔寔字子鎮涿郡安平人瑗子也舉至孝獨行明於政體吏才有餘論當世便事數十條名曰政論指切時要言辯而確當世稱之拜議郎遷大將軍冀司馬與邊韶延篤等著作東觀出爲五原太守五原土宜麻枲而俗不知織績民冬月無衣積細草而臥其中見吏則衣草而出寔至官斥賣儲待爲作紡績織紝練縲之具以教之民得以免寒苦是時寇連入雲中朔方殺略吏民一歲至九奔命寔整勵士馬嚴烽候寇不敢犯常爲邊最先是瑗妻劉氏有母儀淑德博覽書傳及寔在五原常訓以臨民之政寔之善績母有其助焉後拜尚書稱疾免歸卒

陳翔字子麟汝南邵陵人少知名善交結察孝廉太尉周景

辟舉高第累遷定襄太守後坐黨事考黃門北寺獄以無驗見原卒於家

賈琮字孟堅東郡聊城人舉孝廉中平元年舉爲交趾刺史民歌賈父又爲冀州刺史州界翕然靈帝後大將軍何進表爲度遼將軍卒於官

魏

田豫字國讓漁陽雍奴人鄆陵侯曹彰征代郡以爲相彰平代皆豫策也魏文帝初持節護烏桓校尉比能彌加素利共要誓豫以戎狄爲一非內地之利乃先搆離之素利爲比能所攻求救豫單將銳卒深入寇前後斷截豫從他道引去寇追到馬城圍之十重豫出其不意追擊破之烏丸王骨進桀黠豫因出塞按行單將麾下百餘騎入進部進

逆拜遂使左右斬之顯其罪惡以令衆皆怖懼不敢動便以進弟代進威震沙漠山賊高艾聚數千人寇鈔豫誘使素利部斬艾封長樂亭侯爲校尉九年恒摧抑兼并乖散疆猾凡逋亡奸宄皆搆刺攬離使凶邪之謀不遂聚居之類不安而幽州刺史王雄支黨毀之遂轉爲汝南太守領并州刺史外部聞其威名相率來獻豫性清約儉素賞賜皆散之將士素利等數來客見多遺牛馬豫悉轉送官皆以爲前所遺物顯露不如持金乃密懷金三十斤謂豫曰願避左右從之因跪曰我見公貧故前後遺公牛馬公輒送官今密以此上公可以爲家資豫張袖受之答其厚意去後皆悉付外具以狀聞詔褒之曰昔魏絳開懷以納戎今卿舉袖以受狄金朕甚嘉焉賜絹五百疋豫以其半藏

少府後復來以半給與外夷咸高豫節州界寧肅百姓懷之徵爲衛尉稱疾食卿祿卒嘉平六年下詔褒揚賜其家錢穀

北魏

元安壽陽平王新城子景穆帝孫也高祖賜名頤累遷懷朔鎮大將都督三道諸軍事北討詔徵赴京勗以戰伐之事對曰當仰仗廟算使呼韓同渭橋之禮帝歎曰壯哉王言朕所望也未發遭母憂詔遣侍臣以金革敦喻旣殯而發與陸叡集三道諸將議軍途所詣於是中道出黑山東道趨土盧河西道向侯延河軍過大磧大破蠕蠕頤入朝詔曰王之前言果不虛也後除朔州刺史及恒州刺史穆泰謀反遣使推頤爲主頤密以狀聞泰等伏誅帝甚嘉之景

明六年薨於青州刺史諡曰莊

源懷隴西王賀子謙恭寬雅有大度襲爵拜征南將軍尋持節督諸軍屯於漠南又督諸軍征蠕蠕六道大將咸受節度遷尚書令後例降公加衛大將軍景明二年除車騎大將軍詔爲使持節加侍中行臺巡行北邊六鎮恒燕朔三州賑給貧乏兼採風俗考論殿最事之得失皆先決後聞自京師遷洛邊朔遙遠加連年旱儉百姓困弊懷銜命巡撫存恤有方便宜運轉有無通濟時后父于勁勢傾朝野勁兄于祚與懷宿昔通婚時爲沃野鎮將頗有受納懷將入鎮祚郊迎道左懷不與語卽劾祚免官懷朔鎮將元尼須與懷少舊亦貪穢狼籍置酒請懷謂懷曰命之長短由卿之口豈可不相寬貸懷曰今日之集乃是源懷與故人

飲酒之坐非鞫獄之所也明日公庭始爲使人檢鎮將罪狀之處尼須揮淚而已無以對之懷旣而表劾尼須其奉公不撓皆此類也懷又表曰景明以來北番連年災旱高原陸野不任營殖唯有水田少可蓄畝然主將參僚專擅映美瘠土荒疇乃給百姓因此困弊日月滋甚諸鎮水田請依地令分給細民先貧後富若分付不平令一人怨訟者鎮將已下連署之官各奪一時之祿四人已上奪祿一周北邊番鎮事異諸夏往日置官全不差別沃野一鎮自將已下八百餘人黎庶怨嗟僉曰煩猥邊隅事尠實少畿服請主帥吏佐五分減二詔曰省表具恤民之懷已勅有司一依所上下爲永準如斯之比不便於民損化害政者其備列以聞時細民爲豪彊陵壓積年枉滯一朝見申者

日有百數所上事宜便於北邊者凡四十餘條皆見嘉納正始元年九月蠕蠕率十二萬騎欲直趨沃野懷朔南寇恒代詔加使持節侍中出據北番指授規略隨須徵發諸所處分皆以便宜從事又詔懷子直寢徽隨懷北行詔賜馬一匹細鎧一具御稍一枝懷拜受訖乃於其庭跨鞍執稍大呼顧謂賓客曰氣力雖衰尚得如此蠕蠕雖畏壯輕老我亦未便可欺今奉廟勝之規總驍悍之衆足以擒其酋帥獻俘闕下耳時年六十一懷至雲中蠕蠕亡遁旋至恒代按視諸鎮左右要害之地可以築城置戍之處皆量其高下揣其厚薄及儲糧積仗之宜犬牙相救之勢凡表五十八條自魏歷齊北鎮諸戍東西九城是也遷驃騎大將軍三年六月卒年六十三懷性寬容簡約不好煩碎恒

語人曰為貴人理世務當舉綱維何必須太仔細也譬如為屋但外望高顯楹棟平正基壁完牢風雨不入足矣斧斤不平斲削不密非屋之病也故府寺議諡靖諡穆而詔曰府寺所執金不克允愛民好與曰惠可諡惠公

宇文福其先南單于之遠屬也世為擁部大人福少驍果有膂力性忠清以信馭人甚得聲譽後除懷朔大將至鎮卒宋世景河南尹翻第三弟西河人徙廣平少自修立精經義族兄弁甚重之對策上第左僕射源懷引為行臺郎巡察州鎮十有餘所黜陟賞罰莫不咸允遷徙七鎮別置諸戍明設亭堠以備北部懷大相委重還薦於世宗曰宋世景文武才略當今寡儔清平忠直亦少其比陛下若任之以機要終不減李冲也後母喪毀卒撰晉書未就

婁寶代人伏連曾孫性淳樸好讀書明帝時為朔州刺史時邊事屢興人多流散及寶至稍安集之殘壤舊宅皆命葺構人歸繼路歲考為天下最

楊椿華陰人朔州刺史寬謹之性英敏之才內政修明外防甚肅

北齊

高叡小名須拔父琛高祖弟也封南趙郡公斛斯椿等豐結

高祖將謀內討以晉陽根本召琛掌留後事以為并肆汾大行臺僕射領六州九酋長大都督其相府政事琛悉決之卒諡貞平叡生三旬而孤聰慧夙成特為高祖所愛襲爵顯祖受禪晉王天保八年除北朔州刺史都督北燕北蔚北恒三州及庫推以西黃河以東長城諸鎮諸軍事叡

慰撫新遷量置烽戍內防外禦備有條法大為兵民所安
有無水之處禱而掘井鑿插裁下泉源湧出至後號曰趙
郡王泉九年車駕幸樓煩朝於行宮從還晉陽皇建初行
并州事孝昭臨崩預受顧託奉迎世祖於鄴突厥侵軼并
州帝親御戎六軍進止皆令取獻節度以功復封宣城郡
公世祖崩葬後數日議出姦倖和士開執之彌固乃被搆
算拉殺於雀離佛院

高勣字敬德清河王岳子改封樂安王出為朔州行臺僕射
後主晉州敗太后從玉門道還鄴都敕勣統領兵馬侍衛
時倭幸閭寺猶行暴虐民間雞犬悉放鷹犬搏噬取之勣
收儀同三司苟子溢狗軍欲行大戮太后有令然後釋之
劉文殊竊謂勣曰子溢之徒言成禍福何容如此豈不慮

後生毀謗耶勣攘袂語文殊曰自獻武皇帝以來撫養士
卒委政親賢用武行師未有折衄今西寇已次并州達官
多悉委叛正坐此輩專政弄權所以內外離心衣冠解體
若得今日斬此卒明日及誅亦無所恨王國家姻婭須同
疾惡反為此言豈所望乎後入周

段榮字子茂姑臧武威人祖信家於五原郡榮專意星象高
祖建義山東贊成大策為行臺右丞西北道慰諭大使巡
方曉喻所在下之卒諡昭景

叱列平代郡西部人襲第一領民酋長孝昌末拔陵反叛茹
茹餘眾入寇馬邑平以統軍屬有戰功後牧子作亂劉胡
喻斛律可那律俱時構逆以平為都督討定胡喻等高祖
起義平歸誠從平爾朱兆武定初除廓州刺史齊天保中

卒諡莊

北周

李淑仁隴西人朔州刺史驍健有武力征伐多奇功

庫狄迴洛代人朔州刺史少有武力儀貌魁偉以果斷稱

隋

源雄字世略西平樂都人隴西王纂子周封朔方郡公隋歷

朔州總管突厥來寇雄輒捕斬之深爲北部所畏平陳進

位上柱國復鎮朔州二歲徵還卒

郭衍字彥文太原介休人周儀同大將軍伐齊令衍從陳王

守千里徑又從戰於晉州追至高壁大敗之仍從平并州

以功授上柱國累封武山郡公隋開皇五年授朔州總管

所部恒安鎮北接番境常勞轉運衍乃選沃饒地置屯田

歲剩粟萬餘石民免轉輸之勞又築桑乾鎮皆稱旨十年

從晉王廣鎮揚州大業中再封真定侯卒諡襄

李充隴西成紀人慷慨有英畧開皇中授上柱國武陽郡公

拜朔州總管甚有威名爲寇所憚

裴肅字神封河東聞喜人開皇十七年自繕部侍遷朔州長

史有能名

李克開皇中爲朔州刺史有威名

王仁恭字元實天水上邽人仁壽中歷驃騎將軍從楊素擊

平漢王諒進大將軍拜呂州刺史突厥寇邊詔以本官領

馬邑太守始畢率騎數萬寇馬邑復令二特勒將兵南過

時郡兵不滿三千仁恭簡精銳逆擊破之獲數千級并斬

二特勒其後突厥復入定襄仁恭率兵四千掩擊之斬千

餘級大獲六畜而還尋爲校尉劉武周所害

宇文弼字公輔洛陽人慷慨有大節博學多能歷朔州總管韓果少驍雄善騎射以功歷陞朔州刺史

魚俱羅馮翊下邳人身長八尺膂力絕人聲氣雄壯言聞數百步累以戰功封高唐縣公進柱國仁壽中拜豐州總管初突厥數入境爲寇俱羅輒擒斬之自是突厥畏懼屏迹不敢畜牧於塞上後討賊劉元進等以誣死

楊廓大業中爲朔州刺史煬帝北巡過代州邱和獻食甚精至朔州廓獨無所獻

唐

李素立趙州高邑人貞觀中累拜揚州都督府司馬初突厥鐵勒部內附卽其地爲瀚海都護府卽燕然都護也詔素

立領之時闕泥熟別部數梗邊素立以爲不足用兵遣使諭降夷人感其惠率馬牛以獻素立止受酒一杯歸其餘乃開屯田立署次虜益畏服封高邑縣侯綿州刺史後徙蒲州會卒高宗特廢朝一日諡曰平

田仁會雍州長安人擢制舉仕累左武侯中郎將太宗征高麗而薛延陀以數萬騎掩河內詔與執失思力率兵擊敗之尾逐數百里延陀幾生得璽書嘉慰六遷勝州都督境有宿賊依山剽行人仁會發騎捕格夷之城門夜開道無寇跡累遷右衛將軍卒諡曰威

程務挺洺州平恩人以軍功遷右領軍衛中郎將破突厥六萬騎於雲州永隆中阿史那伏念叛詔裴行儉討之務挺爲副將仍檢校豐州都督時伏念屯東牙山務挺引兵赴

之伏念懼乃間道降於行儉裴炎以爲非行儉功封務挺平原郡公遷左武衛大將軍單于道安撫大使禦突厥善綏禦士服其威愛突厥憚之不敢盜邊後申救裴炎被害突厥聞之率相慶爲立祠每出師輒禱焉

唐璿字休璟京兆始平人明經高第永淳中爲朔州長史突厥圍豐州都督崔知辨戰死時議棄豐保靈夏璿上疏詳陳其利害高宗從之以功封宋國公同中書門下三品卒贈荊州大都督諡忠

張仁愿華州下邽人有文武才則天時爲并州都督長史神龍二年移潞州三年突厥入寇朔方軍總管沙吒忠義爲賊所敗詔攝御史大夫代忠義統衆仁愿至軍而賊衆已退乃躡其後夜掩擊大破之先朔方軍北與突厥以河爲

界河北岸有拂雲神祠突厥將入寇必先詣祠祭酌求福因牧馬料兵而後渡河時默啜盡衆西擊突騎施婆葛仁愿請乘虛奪取漠南地於河北築三受降城首尾相應以絕其南寇之路太子少師唐休璟以爲兩漢以來皆北守黃河今於寇境築城恐勞人費功終爲賊虜所有建議以爲不便仁愿固請不已中宗竟從之仁愿表留年滿鎮兵以助功時咸陽兵二百餘人逃歸盡擒之一時斬城下軍中殷粟役者盡力六旬而三城就以拂雲祠爲中城與東西兩城相去各四百餘里皆據津濟遙相應接其北皆大磧也拓地三百餘里於牛頭朝那山北置烽堠一千八百所自是突厥不得度山放牧朔方無復寇掠減鎮兵數萬人仁愿初建三城不置壅門及郤敵戰格或曰邊城不爲

守備何也仁愿曰兵貴攻取不宜退守寇若至此卽當併力出戰廻顧望城猶須斬之何用守備生其退恧之心也其後常元楷爲總管始築壅門議者益重仁愿而輕元楷焉仁愿嘗奏用監察御史張敬忠等數十人皆以文章著稱多至大官時稱其知人景龍二年拜左衛大將軍同中書門下三品封韓國公春還朝秋復督軍備邊中宗賦詩祖餞賞賜不可勝紀尋加鎮軍大將軍睿宗初致仕加兵部尚書卒贈太子少傅仁愿爲將號令嚴將吏信服按邊撫師賞罰必值功罪後人思之爲立祠受降城出師輒享焉

王峻滄州景城人擢明經第則天末累拜鴻臚卿充朔方副大總管安北大都護豐安定遠等城並受節度開元二年

以破吐蕃功封清源縣男進并州都督府長史明年突厥默啜爲拔曳固所殺其下多降分置河曲峻上書言宜置內地不然者且必有變書未報而虜已叛乃敕峻將并州兵濟河以討之峻間行卷甲捨幕趨山谷夜遇雪恐失期誓於神曰峻事君不以忠不討有罪天所殛者當自蒙罰士衆無罪心誠忠而天監之則止雪反風以獎成功俄而和霽自東道追及大破之獲級三千又破蹀趺部勺磨等封清源公徙封中山郡公進吏部尚書太原尹代張說爲兵部尚書同中書門下三品充朔方節度大使河北河西河東隴右盡屬卒贈尚書左丞相諡忠烈

田歸道雍州長安人仁會子擢明經第累拜左衛郎將默啜請和將至單于都護府詔攝司賓卿往勞默啜請六胡州

地及都護府地不得執歸道將害之歸道色不撓詈且讓
爲陳害福會有詔賜默啜綵粟許結婚於是更以禮遣歸
道旣還具陳默啜不臣狀請備邊已而果驗神龍中遷右
金吾將軍卒追封原國公諡曰烈

解琬魏州元城人舉幽素乘邊二十年景雲二年再拜朔方
軍大總管分遣隨軍要籍官料三城兵省戍十萬尋授右
武衛大將軍兼檢校晉州刺史賜爵濟南縣男終同州刺
史

顏真卿字清臣開元進士甲科四命爲監察御史使河隴時
五原有冤獄久不決天且旱真卿辯獄而雨郡人呼御史
雨復充河東朔方試覆屯交兵使朔方令鄭延祚母卒二
十九年殞僧舍垣地真卿劾奏之兄弟終身不齒天下聳

動歷拜太子太師封魯郡公死節諡忠烈

韓游瓌靈武人始爲朔方節度郭子儀裨將安祿山使阿史
那從禮將同羅突厥五千騎僞降於朔方出塞門誘河曲
九蕃府六胡叛部落五十萬子儀使游瓌率辛京杲擊破
之九蕃府還附以功累拜邠寧節度使檢校尚書左僕射
與馬燧渾瑊共平河中終右龍武統軍諡曰襄

李光進河曲部落稽阿跌之族隸朔方軍姊適舍利葛旃殺
僕固瑒而事河東節度使辛雲京因依葛旃家於太原至
德中以破賊功授代州刺史封范陽郡公郭子儀討大同
橫野及河北殘寇用光進爲都知兵馬使封武威郡王元
和四年討王承宗范希朝表爲步都虞候六年充單于大
都護振武節度使賜姓李氏卒贈尚書左僕射

李景畧幽州良鄉人大曆末客河中闔門讀書李懷光爲朔方節度景畧署巡官五原將張光殺其妻以貨市獄前後不能決景畧覈實論殺之旣而有若如厲者敬謝庭中如光妻狀顯名於時回紇將南寇朝議當得良將舉景畧拜豐州刺史天德軍都防禦使窮塞苦寒地瘠鹵邊戶勞瘁景畧至節用約已與士同甘苦鑿感應永清二渠溉田數百頃儲廩器械畢具威令肅然以禮制虜聲雄北疆回紇畏之卒於屯贈工部尚書

任迪簡京兆萬年人舉進士爲天德軍使李景畧判官性重厚嘗軍宴行酒者誤以醯進迪簡以景畧性嚴慮坐主酒者乃勉飲盡之而僞容其過以酒薄白景畧請換之於是軍中皆感悅貞元二十年景畧卒衆以其長者議請爲帥

監軍聞之拘迪簡於別室軍衆連呼而至發扃取之表聞德宗使察之具以軍情奏除豐州刺史天德軍使時公私缺乏欲饗士無所給至與門下同糲食身居戟戶踰月軍中感其公請安臥內三年上下完充自殿中監授兼御史大夫加常侍入拜太常少卿出鎮易定以疾改太子賓客卒諡曰襄

石雄徐州人敢毅善戰黨項擾河西召隸振武劉沔軍破羌有勞會昌初回鶻入寇連年掠雲朔牙五原塞下詔雄爲天德防禦副使兼朔州刺史佐劉沔屯雲州沔召雄謀雄卽選沙陀李國昌及契苾拓跋雜虜三千騎夜發馬邑旦登振武城望之見鬪車十餘乘從者朱碧衣謀者曰公主帳也雄潛使喻之穴城夜出縱牛馬鼓譟直擣烏介帳可

山西通志 卷九十五 名宦
汗單騎走斬萬級獲馬牛羊不貲迎公主還進豐州防禦使武寧李彥佐討劉禎逗留以雄爲晉絳行營諸軍副使時王宰屯萬善劉沔屯石會關顧望莫先進雄受命卽勒兵越烏嶺破賊五壁斬獲千計賊大震雄臨財廉賜與輒置軍門自取一匹縑餘悉分士伍繇是衆感發無不奮武宗喜曰今將帥義而勇罕雄比者就拜行營節度使代彥佐徙河中稹危蹙其大將郭誼密獻欵衆疑其詐雄大言曰誼爲稹謀主今欲殺稹乃誼自謀又何疑雄以七千人徑薄潞受誼降進檢校兵部尚書徙河陽白敏中猥曰黑山天井功所酬已厭拜神武統軍卒

范希朝河中虞鄉人德宗初除振武節度使加檢校禮部尚書振武有党項室韋諸郡時爲盜希朝於要害置柵堡斥候嚴密人遂獲安爲盜者必殺無赦戎虜甚憚之曰有張光晟苦城久矣今聞是乃更姓名而來其見畏如此蕃落凡有進獻無所受積十四年皆保塞不爲橫城中少樹希朝於他處市柳子命軍人種之俄遂成林居人賴之貞元末表請入朝時諸鎮不以事自述職者希朝而已拜檢校右僕射兼金吾大將軍元和初累遷河東節度使敗王承宗於木刀溝除左龍武統軍致仕卒贈太子太師諡曰宣武

高霞寓范陽人從平劉闢封感義郡王元和五年以左威衛將軍從吐突承瓘擊王承宗加散騎常侍承瓘執昭義盧從史其軍驚遣霞寓諭之麾而大呼曰元惡縛矣公等宜自安卽脫鎧揖而前衆遂定欲留爲帥霞寓間道去明年

改豐州刺史三城都團練防禦使累遷工部尚書左衛大將軍長慶三年為振武節度使吐蕃攻鹽豐二州以兵五千屯拂雲堆寇引去浚金河漑鹵地數千頃歷右金吾衛大將軍卒贈太保

史獻忠字元貞建康人少為魏牙門將以善戰顯名大中初突厥擾河東鈔漕米行賈命為振武軍節度使先是鎮帥使游奕兵覘戎有良馬牛彊取之歸值十一戎人因興盜掠獻忠廉儉少所欲常曰吾居河朔去此三千里乃乘五健馬今守邊發吾餘俸不患無馬何忍豪市哉故所至莫不懷德累封北海縣子檢校尚書左僕射卒贈司空

宋

賀懷浦開封陳留人孝惠后兄也太平興國初以岳州刺史

領兵屯三交雍熙三年從楊業北征沒於陣

薛超遼州平城人雍熙三年以神衛軍都校從潘美至西陁敗遼師追至寰州降之超連被劓流血濡甲縷部分軍士自若遂下應州仕至天武指揮使卒

孫益宣和末以福州觀察使知朔寧府命救太原時敵勢張甚或言不若北擣雲中彼將士室家在焉所謂攻其所必救也益曰此策固善無違君命因躍馬冒圍至城下張孝純不肯啟門遂死之益天資忠勇傾貲以賞戰士能得人死力云

遼

耶律奚低孟父楚國王之後便弓馬勇於攻戰統和四年為右皮室詳穩時宋將楊繼業陷山西郡縣從樞密使斜軫

禦之凡戰必以身先矢無虛發繼業敗於朔州之南匿深林中奚底望袍影而射繼業墮馬先是軍令須生擒繼業奚低以故不能爲功後屢有戰績卒

金

耶律懷義遼宗室金宗翰取西京天祚謀奔於夏懷義諫止之不聽乃竊取廐馬歸金命領謀克從軍天會初帥府以新降諸部大小遠近不一令懷義易置之承制以爲西南路招討使乃擇諸部衝要之地建城市通商賈諸部兵革之餘人多匱乏自是衣食歲滋畜牧蕃息矣從宗翰伐宋降馬邑破雁門屯軍進攻太原以所部別降清源縣徐溝鎮遂與諸將別屯汾州之境時河東陝西路兵來攻太原劉光世折可求柵於文水西山懷義捕得生口盡知宋兵

屯守要害乃分兵襲敗之明年從婁室取汾州及其屬邑遂過平陽出澤潞以趨河陽所至皆降七年還鎮十年改西北路懷義在西陲幾十年撫御有恩及去老幼遮道攀戀數日不得發天眷初爲太原尹治有能聲後封蕭王海陵末卒於雲中

完顏蒲查治訶孫領猛安皇統間除同知開遠軍節度使斥候嚴整邊境無事大定中再遷開遠軍節度使卒蒲查廉潔忠直臨事能斷凡被任使咸稱

蕭仲宣遼中書令守司空特末子從天祚至石輦鐸天祚留仲宣侍母遂皆見獲皇統時歷順義昭義軍節度使爲政平易小吏不敢爲姦賄賂禁絕奴婢入郡人莫識其面朔潞百姓皆爲立祠刻石頌之正隆二年卒

完顏永元字惇禮本名元奴代王克子幼聰敏日誦千言大定中爲順義軍節度使朔州西境多盜而猾吏大姓蠹獄訟稽亂賦役永元剔其夙姦百姓安之坐賣馬與驛人解職又起歷昭義絳陽軍節度使後卒永元歷典大藩多知民間利害所至稱治順義政迹尤著民爲立祠

孟奎字元秀遼陽人大定二十一年進士平章政事完顏守貞禮接士大夫在其門者號冷巖十俊奎其一也累遷同知西京路轉運使事改僉河東南北路按察司事武州刺史上言三事貞祐初卒諡莊肅

蒲察鄭留字文叔東京路猛安人大定二十二年進士累官順義軍節度使西京人李安兄弟爭財府縣不能決按察司移鄭留平理月餘不問會釋奠孔子廟乃引安兄弟與

諸生敘齒列坐會酒陳說古之友悌數事安兄弟感悟謝曰節使父母也誓不復爭相讓而歸朔州多盜鄭留禁絕游食及多蓄兵器因行春撫諭之盜乃衰息獄空賜錫宴錢以褒之貞祐中致仕卒

移刺福僧東北路烏連苦河猛安人以蔭補吏歷順義軍節度副使部內世襲猛安木吞掠民婦女藏之窟室人頗聞之無敢發其罪者福僧請於節度使願自效旣跡得其所在率人索之得婦女四十三人木吞抵罪轉同知開遠軍節度事後致仕元光元年卒

元

趙伯忽世延子爲夔州路總管天曆初囊加台據蜀死於難諡忠愍

明

石享鳳翔人洪武間知朔州勸民力穡訟至立得其情兩諭解之民皆感悅後坐事免官朔父老爭赴闕頌其治行乞留詔從之

黃里雲內州同知洪武五年秋蒙古兵突入城里率兵巷戰力屈死之

朱榮字仲華沂州人永樂十二年冬以左都督充總兵官鎮大同修忙牛嶺兔毛河赤山榆楊口來勝諸城寇不敢近居三年召還封武進伯佩征虜前將軍印卒贈侯諡忠靖張復長葛人永樂間任朔州以才幹稱

呂文延津人成化間知朔州性廉直人不敢干以私體恤民隱備至尤善營建自學宮以至舖舍胥煥然一新時稱循

吏

莊鑑遼東人襲遼右衛指揮使驍猛有膽決遇賊輒奮成化十九年爲大同西路參將亦思馬因入邀其歸戰牛心山寇遂遁鑑所部無亡失賚銀幣後鎮宣府以才與大同總兵官張俊易鎮卒

齊壽蠡縣人弘治四年以監生知馬邑縣禁戢兇徒撫安善類蓋令之才守兼優者

程端山東冠縣人弘治十一年由舉人知朔州邃性理學於算術尤精勤政愛民不求媚上嘗扁其軒曰競辰有競辰稿并周天圖說

張俊宣府前衛人嗣世職指揮使累擢大同游擊將軍弘治十二年以功晉都指揮同知火篩入左衛擊却三萬餘騎

上大喜立擢都督僉事未幾總兵官王璽失事被徵卽命
後代之冬以寇入戴罪後晉同知卒

李端直山東曹州人弘治十七年由舉人知朔州清慎公直
爲當道重一時難決之獄悉以委之皆能辨理民以爲不
寃創修朔州誌

翟鵬字志南撫寧衛人正德三年進士嘉靖二十年俺答入
山西內地兵部請遣大臣督軍起鵬右僉都御史整飭畿
輔山西河南軍務兼督餉鵬馳至俺答已飽去而吉囊軍
復寇汾石諸州鵬往來馳驅不能有所挫寇退乃召還二
十一年三月總督樊繼祖罷除鵬兵部右侍郎代之上疏
言將吏遇被掠人牧近塞宜多方招徠殺降邀功者宜罪
寇入官軍遏敵雖無功竟賴以安者當錄如賊衆我寡奮

身戰雖有傷折未至殘生民者罪當原於法俘馘論功損
挫論罪乃有摧鋒陷陣不暇斬首而在後掩取者反積級
受功有逡巡觀望幸苟全而力戰當先者反以損軍治罪
非戎律之平皆從其議會降人言寇且大入鵬連乞兵餉
上怒令革職間住因罷總督官不設鵬受事僅百日而去
七月俺答復大入縱掠太原潞安兵部請復設總督乃起
鵬故官令兼督山東河南軍務巡撫以下僉聽節制鵬受
命寇已出塞卽馳赴朔州請調陝西薊遼客兵八支及宣
大三關主兵兼募土著選驍銳者十萬統以良將列四營
分布塞上每營當一面寇入境游兵挑之誘其追諸營夾
擊脫不可禦急趨關南依墻守邀擊其困歸上從之鵬乃
濬壕築垣修邊墻九百三十餘里增新墩二百九十二護

墩堡一十四建營舍一千五百間得地萬四千九百餘頃
募軍千五百人人給五十畝省倉儲無算疏請東至平刑
西至偏關畫地分守增游兵三支分駐雁門寧武偏關寇
攻墻戍兵拒游兵出關夾攻此守中有戰東大同西老營
堡因地設伏伺寇所向又於宣大三關間各設勁兵而別
選戰士六千分兩營遇警令總督武臣張鳳隨機策應此
戰中有守上從其議且命自今遇敵逗遛者都指揮以下
卽斬總兵官以下先取死罪狀奏先是鵬遣千戶火赤力
率兵三百不見寇復選精銳一百遠至豐州西北遇牧馬
者百餘人擊斬二十三級奪其馬還未入塞寇大至官軍
饑憊盡棄所獲奔鵬其實陳狀上以將士敢深入仍行遷
賞舊例兵皆團操鎮城聞警出戰自邊患熾每夏秋間分

駐邊堡謂之暗伏鵬請入秋悉令赴塞畫地分守謂之擺
邊九月終還鎮遂著爲令二十三年正月上以去歲無寇
降敕獎之賜襲衣三月晉兵部尚書上倚鵬殄寇錫命屢
加而責效甚急鵬亦竭智力然勢不能呼吸應變九月薊
州巡撫朱方請撤諸路防秋兵兵部尚書毛伯溫因并撤
宣大三關客兵十月寇繇順聖川經浮圖峪入鵬在朔州
聞警夜半至馬邑調兵食復趨渾源遣諸將禦敵御史楊
本深兵科戴夢桂劾鵬逗遛遂遣官械鵬坐戍卒而以兵
部左侍郎張漢代人皆惜之隆慶初復官

楊博字惟約蒲州人嘉靖八年進士三十五年兵部尚書許
論罷起博代之博未終喪䟽辭而上以大同右衛圍急改
博總督宣大山西軍務博墨縑馳出關未至侍郎江東等

山西通志 卷九十五
以大軍進寇引去右衛圍六月守將王德戰亡芻粟且盡
士死守無二心博厚加褒卹奏行善後十事事訖當還以
給事中張學顏言留博鎮撫奏蠲被寇租因僉其丁壯爲
義勇分隸諸將博以邊人不習車戰寇入輒不支請造偏
箱車百輛有警則右衛車東左衛車西使相聲援又以大
同墻圯繕治爲急次則塞銀釵驛馬諸嶺以絕窺紫荆路
備居庸南山以絕窺畿甸路修陽方神池諸墻塹以絕入
山西路乃於大同牛心山諸處築堡九墩臺九十二接左
衛高山站以達鎮城濬大壕二各十八里小壕六十有四
五旬訖功賜敕獎賚上數欲召博還又虞邊以問大學士
嚴嵩嵩素不喜博請令江東署部事俟秋防畢徐議之遂
不召是歲秋防訖給事中王文炳請召博還上以邊防非

博不可命加太子太保留鎮如故哮素把伶及叛人了都
記等數以輕騎寇邊博先後計擒之又數出奇兵襲寇寇
稍徙帳因議築總督翁萬達所創邊墻招還內地民爲寇
掠者千六百餘人又請通宣大荒田水利薄其租報可旋
移薊遼總督後晉吏部尚書少師致仕卒贈太傅諡襄毅
吾一奎北直宣化府人左衛副將嘉靖四十年邊寇屬堡一
奎昌矢石親斬十餘級敵解去

王鳴齊東縣人嘉靖間由舉人知馬邑縣事性溫厚政尚
寬和訓生徒以振士風開河渠以固城郭士民賴之

崔世榮爲大同參將嘉靖四十五年冬寇犯威遠衛世榮以
兵二百禦之與子大朝大賓俱死樊皮嶺獲贈卹

陳董德字懋修歸善人嘉靖四十四年進士萬曆初爲兵科

給事中成國公朱希忠卒贈定襄王力爭之忤張居正出
爲饒州知府操江都御史王篆承居正旨誣劾之謫馬邑
典史復除名後終湖廣僉事

申其學山東人萬曆間以貢知朔州深悉民隱當時稱循良
第一陞長沙府

李熙大同右衛人沉毅有謀以昌平總兵掛征西大將軍印
鎮大同先是萬曆間爲薊鎮裨將與士卒同甘苦傷者撫
死者葬軍士感德及鎮大同會當欵後訓練士卒常若有
事召入掌後軍都督府

屈焯陝西蒲城人萬曆二十三年由選貢知朔州不虐善良
不畏強禦在任八年加銜府同知仍管州事致仕

趙尙陝西榆林衛人左衛副將訓練軍士有方後總鎮宣大

邵定左衛人任三關遊擊戎騎大舉入寇定領兵截殺日暮
入草塚山堡被圍數日食盡死之

國朝

王京順德人順治元年任朔州吏目姜逆之亂死其官

楊達太康人順治三年以拔貢通判朔州風采凜然歲饑捐
俸煮粥全活甚衆雅好崇獎士類請業者經指授胥有法
姜逆之亂賊黨姚徇朔州達首倡義諭衆而守備張英實
通賊達覘知密計擒之錮於獄設守禦具翼日登陴道標
康姓英黨也按佩刀怒目視達達立起奪其刀英子復鼓
譟賊黨乘之入城因爲所執賊欲誘之降達大怒目皆盡
裂罵賊不絕口賊怒磔殺之事聞

贈山西按察司僉事

徐一范江南蕪湖人以進士任禮部郎中轉左衛兵備道時業知姜瓖變私念猶子明弼知馬邑縣可藉以殺賊驅車直前不少沮北至城下傷於槌蓋賊黨環匝一范固無繇察也至死罵不絕口

宋子玉遼東人順治間任大同兵備道駐朔州姜逆之亂密與通判楊知州王謀靖內患既而變猝起謀不克遂因手刃愛子以死

王家珍遼東人順治五年任朔州知州十二月死姜逆之亂家珍有幹畧蒞任不半期竟以節殉識者惜之

彭有德遼東人順治間以軍功陞右衛叅將姜逆之亂勢甚熾有德抗志不屈賊圍署捍禦不支單騎潰圍投親王帳家人六十餘口胥遇害後仕至大同總兵

費揚武正白旗滿洲人以内大臣撫遠大將軍兼攝右衛建威將軍康熙三十五年統滿漢兵出殺虎口與大同總兵康調元殺虎口協鎮王元登天山過瀚海直抵招磨多地方征厄魯特嘎爾噶爾丹飲藥死擒其妻子以歸凱旋論功封為一等公餘陞賞有差

徐宗仁陝西長安人先以把總出西寧先登又勦西海爾各隆寺有功雍正六年擢殺虎口副將蒞任後復赴陝從征駐峩崙磯轉戰卜羅罇井紅山峽殺賊甚眾賊悉以眾至宗仁據山待之自辰至未戰益力以火器傷殞授世襲拜他拉布勒哈番祀忠勇祠

寧武府

唐

李大恩宗室子封定襄郡王武德四年守雁門突厥頡利與馬邑苑君璋帥衆來攻大恩擊走之頡利懼乃放還前拘使臣孫順德蘇瓌鄭元璫請和五年春大恩奏突厥饑荒馬邑可圖詔與殿內少監獨孤晟帥師討之期以二月會馬邑晟後期不至大恩頓兵新城突厥遣數萬騎與劉黑闥合軍圍之大恩戰歿於陣

宋

趙滋字子深開封人韓琦言真將帥才薦授并代路鈐轄改管勾河東經畧司公事建言代州寧化軍有地萬頃皆肥美可募人田作教戰射爲堡砦人以爲利終天武捧日四廂都指揮使滋馭軍嚴簿書米鹽皆有條法而性尤廉謹月得公使酒不以入家云

郭逵字仲通邢州人慶曆中通事舍人坐使遼黜爲汾州都監時龐籍鎮河東俾權忻州遼來求天池廟地籍不能決以誘逵逵訪得太平興國中故牘證爲王土檄報之遼人愧伏治平二年同簽書樞密院出判永興坐案王韶落宣徽使知潞州徙太原復宣徽使再貶致仕哲宗起知潞州進廣州觀察治知河中辭歸洛卒

崔鷗字德符陽翟人第進士徽宗初極論司馬光忠章惇姦蔡京籍爲邪黨移病屏處十餘年宣和六年起通判寧化軍召入道中草疏曰數十年來王公卿相皆自蔡京出要使一門生死則一門生用一故吏逐則一故吏來更持政柄無一人立異無一人害已者此京之本謀也海寓胥壯之晉龍圖閣直學士卒

張汝明字舜文廬陵人第進士徽宗時以司門員外郎通判
寧化軍地界遼文移數往來汝明名觸其諱遼以檄暴於
朝安撫使問故衆欲委罪於吏汝明日詭辭欺君吾不爲
也責監壽州麻步場晚知岳州卒

金

完顏九住宗室子爲武州刺史唐括孛果速爲軍事判官貞
祐二年十一月元兵取九住子姪抵城下謂之曰山東河
南今皆降我汝之家屬我亦得已不速降且殺之九住曰
當以死報國遑恤家爲無何城破力戰而死孛果速亦不
屈死焉贈九住臨海軍節度使加驃騎衛上將軍孛果速
建州刺史加鎮國上將軍仍令樹碑歲時致祭

元

魏賽因不花息州人至正間以河南省右丞統兵守偏頭關
克武州不戮一人民爲立碑思之

明

汪興祖巢縣人洪武元年以都督兼右率府使西取大同將
三衛卒守之再敗敵兵斬獲無算進克武朔二州獲知院
馬廣等命爲晉王武傅兼山西行都督府僉事三年冬封
東勝侯四年伐蜀中飛石死

馮徵綏德衛人弘治末署指揮僉事守備偏頭關正德七年
勦流賊力戰洛南死贈洛南伯明年是日徵死所風霾大
作又明年亦如之建祠

陳經正德間以太原左衛指揮任寧武守備少有大節善騎
射博涉經史工書畫事繼母以孝聞涖官值邊警率所部

奮勇力戰歿於陣事聞贈昭勇將軍立祠春秋祀之
 李涑容城人廕保定後衛指揮僉事累晉山西總兵官寇四
 入驢皮砦諸處涑及游擊史畧禦却之寇再闖三關涑拒
 險不得入俄突神池利民堡迎戰於野猪溝驅之出境晉
 署都督同知以援河曲老營堡稍後停俸嘉靖三十二年
 寇犯大同壁永安堡寇得利去尋復自大同入山西巡撫
 趙時春帥師至廣武聞有零騎欲親擊之涑力諫不從追
 及於大蟲嶺伏兵四起涑太息謂時春日公急去吾死此
 時春奔寇欲追之涑殊死遮擊與子松及遊擊李柱參將
 馮恩守備孔賓高遷指揮陳金尹忠俞輝皆戰死一軍盡
 歿贈涑少保左都督諡忠愍廕子世指揮使立祠予祭葬
 松亦贈指揮同知恩以下贈卹有差

丁璋為山西副總兵嘉靖二十年寇犯寧武關石湖嶺大戰
 死之贈卹如制

李如松字子茂鐵嶺衛人寧遠伯成梁長子也驍果善戰少
 從父諳兵機萬曆十一年為山西總兵官給事中黃道瞻
 等數言如松父子不當並居重鎮大學士申時行請保全
 之召僉書右府十五年鎮宣府復與山西李迎恩更鎮其
 後軍政拾遺給事中閱視數遭論劾上終眷之不為動後
 平寧夏朝鮮二十六年搗土蠻巢力戰死諡忠烈

李修吉字允敬同州人萬曆丙戌進士初授萊州司理讞獄
 多所平反遷戶部主事出理寧武糧儲度支明允宿弊一
 清又條議時宜急需四事皆經國要務疏上深見嘉納未
 幾被誣劾掛冠去修吉性醇謹不務紛華尤篤志純儒業

著理學邇言二卷

陳昌祚福建長樂人前督學道瑞子萬曆間以進士任偏關兵備道輯安兵民尤嘉惠學校嘗過三功祠下眷懷先澤移建南城外順城街中復紀其顛末勒之貞珉祀名宦魯欽長清人萬曆末爲山西副總兵天啓中爲貴州總理勇敢善戰名冠西南諸將六年禦安邦彥殉節贈少保左都督建祠曰旌忠

楊仲業爲山西總兵官天啓中改援遼總兵官父子並戰死贈都督同知世廕千戶從愍忠祠附祀

李輔明遼東人崇禎十二年爲山西總兵官被劾罷十六年冬戰歿於寧遠贈左都督列壇前屯祀之

王允懋字有懷霸州人第進士崇禎時知太原府遷寧武兵備副使李自成旣陷太原遣使說降斬之與總兵周遇吉固守城陷自刎死妻楊投井殉國朝

金光祥遼東人順治五年任寧武兵備僉事道性嚴厲姜逆之亂寧武兵從之光祥自縊死

贈光祿寺少卿廕子入監祀忠烈祠

李吉順治間任寧武副將姜逆之亂部下徧從賊執吉說降吉力斥之投環死

張國纓京衛人順治年以武進士任偏關叅將姜逆之亂時業告疾得請矣聞變不以去位爲解出戰爲賊殺

邱登戎順治間任寧武營把總死姜逆之亂詔恤其家祀忠烈祠

晉

邵續字嗣祖魏郡安陽人素有志烈博覽經史爲成都王穎參軍穎欲討其弟長沙王續諫不納後爲荀曦參軍除沁水令時天下漸亂續去還家糾集義兵以圖興復晉室卒死節

北魏

裴仲規河東聞喜人咸陽王禧爲司州牧辟主簿仍表行建興郡事車駕自代還洛次於郡境仲規備供帳朝於路側高祖詔仲規曰朕開置神畿郡望崇重卿旣首應司隸美舉復督我名邦何能自致也仲規對曰陛下窮神盡聖應天順民棄彼元壤來宅紫縣臣方罄心力躍馬吳會冀功銘帝籍勲書王府豈一郡而已高祖笑曰冀卿必副此言

車駕達河梁見咸陽王謂曰昨得汝主簿爲南道主人六軍豐贍元弟之寄殊副所望後征義陽戰沒贈河東太守謚貞

裴衍字文舒河東聞喜人叔業兄子歸魏歷建興太守又歷河內廉貞寡欲善撫百姓二郡人吏追思之後封臨汝縣公仕至相州刺史北道大都督討葛榮見害

北周

楊惲後周時以給事中行建州事有謀略威恩夙著以擊敗高歡兵授建州刺史後進大都督加晉建二州諸軍事

隋

伊婁謙字彥恭其先隨魏南遷周建德五年聘齊被拘留武帝平齊累封濟陽侯隋初進公出爲澤州刺史清約自處

甚得人和以疾去官吏人攀戀行數百里不絕

房恭懃字慎言河南洛陽人性深沉有局量達於從政隋開皇中以蘇威薦超授澤州司馬有異績賜物百段良馬一匹終海州刺史

張虔雄清河東武城人大業中爲陽城縣令有治績

唐

長孫順德長安人爲高祖太宗所親委拜統軍從平霍邑破臨汾下絳郡尋執屈突通略定陝縣封薛國公貞觀中拜澤州刺史政號明肅先是長吏多受餽餉糺摘一無所容稱爲良牧前刺史張長貴趙士達並占境內膏腴田數十頃劾而追奪之資給貧戶尋坐事免卒謚曰襄

岑翔爲澤州刺史先天二年太上皇命有司頒賜諸州朝集

使善政者遂以翔與同州刺史成大碗及陝州刺史陸餘慶魏州刺史單思遠宋州刺史劉智柔等各賜物一百段李撝雍州長史新興王晉司功也晉遇害寮吏皆奔散惟撝步從仍哭其屍姚崇聞之曰欒向之儔也擢尚書郎轉澤州刺史

李陽冰乾元間爲高平令憂民之憂志切休養博學善書事至談笑處之裕如也

郝福貞元間爲高平令才高事練遭時凶歉移粟分給所在霑被罷止征需不急者以身任咎流亡盡復

明濟貞元間白屯留令調任高平富文學有清節敏於吏事所至有聲嘗濬治丹河民免水患

崔深咸通中知陵川縣撫化百姓甘棠頌德瑞應見屬鄉之

禮義村

王宰智興子會昌中以忠武節度討劉稹進取天井關攻陵川破賊石會關進攻澤州昭義平遂歷上黨太原節度使扞回鶻党項屢立邊功終天雄節度使

曲環陝州安邑人以戰功加左清道率又自將兵代李抱貞守澤州破賊銳將安曉累功封晉昌郡王陳許節度使卒贈司空

後梁

牛存節博昌人仕梁拜左千牛衛上將從康懷英攻潞州聞晉兵攻澤入城助守晉人穴地道以攻之存節選勇士數十亦穴地以應戰於隧中晉兵解去累遷匡國軍節度使同平章事太尉卒贈太師

後唐

裴約潞州牙將也李嗣昭爲昭義軍節度使約以裨將守澤州嗣昭卒其子繼韜以澤潞叛降於梁約召其州人泣而諭曰吾事故使二十餘年見其分財饗士欲報梁仇不幸早世今郎君父喪未葬違背君親吾能死於此不能從以歸梁也衆皆感泣梁遣董璋率兵圍之約與州人拒守求救於莊宗莊宗聞繼韜叛頗有憂色及聞約求救喜曰吾於繼韜何薄於約何厚而約能分逆順耶顧符存審曰吾不惜澤州與梁一州易得約難得也爾識機便爲我取約來存審以五千騎馳至遼州而梁兵已破澤州約見殺

宋

楊咸弼開寶間爲高平令性嚴能決斷每抑挫豪右申理屈

滯愛民勸課開置屯田公私便之

江景房字漢臣太平興國間以侍御史謫沁水尉有善政

裴德裕聞喜人雍熙間澤州知州清廉不擾官至少府監勲
開國侯

義甫慶曆間為高平令進階中散大夫性勤慎法令嚴明調
停賑恤民免勞費而僉民徭尤多所裁省

程顥字伯淳世居中山後從開封徙河南舉進士為晉城令
富人張氏父死且有老叟踵門曰我汝父也子驚疑莫測
相與詣縣叟曰身為醫遠出治疾而妻生子貧不能養以
與張顥質其驗取懷中一書進其所記曰某年月日抱兒
與張三翁家顥問張是時纔四十安得有翁稱叟駭謝民
稅粟多移近邊載往則道遠就糴則價高顥擇富而可任

者預使貯粟以待費大省民以事至縣者必告以孝弟忠
信入所以事其父兄出所以事其長上度鄉村遠近為伍
保使之力役相助患難相卹而姦偽無所容凡孤癯殘廢
者責之親戚鄉黨使無失所行旅出於其塗者疾病皆有
所養鄉必有校暇時親至召父老與之語兒童所讀書親
為正句讀教者不善則為易置擇子弟之秀者聚而教之
鄉民為社會為立科條旌別善惡使有勸有恥在縣三歲
民愛之如父母熙寧初呂公著薦為監察御史裏行哲宗
初召為宗正丞卒文彥博題其墓曰明道先生嘉定十三
年賜謚曰純公淳祐元年封河南伯從祀學宮
楊仲元字舜明管城人第進士仁宗時知澤州沁水縣民持
物來輸者視其價稍增之餘則下其估官有所需不强賦

民聽以所有與官爲入度相當則止率常先辦河外用兵督餉轉西界夕宿洪谷口仲元相其地乃寇所由徑路亟命去之民以困乏爲辭不聽寇果夜出劫諸部沁水獨免後二十年其子過縣父老拜泣曰河西之役非公無今日矣初軍期尚緩而仲元督行甚急至則芻糧有不集者皆可賤市後期者物價數倍民始知其利州買羊斂民差出錢帛滋蔓病民爲甚更其令戶纔費錢百又遣吏市羔於他所明年以供州不科民一錢仕至中散大夫卒仲元嘗戒諸子曰吾入官五十年未嘗以私怒加人雖杖刑之微苟有兩比不敢與輕法以是爲報國爾

李昭邁字逢吉深州饒陽人宗諤從子楊億嘗薦之仁宗時知澤州陽城冶鑄鐵錢民冒山險輸爌炭苦其役爲奏罷

鑄錢又言河東鐵錢真偽淆雜不可不革仕至天章閣待制卒

陸餘慶吳郡人慶曆初爲陽城縣尉時靈勝二州党項爲寇詔餘慶諭以恩信寇率衆歸附民甚德之子璪爲西河太守亦有異績封平恩縣男

呂大忠藍田人嘉祐中任晉城令剛毅質直爲治有聲

吳中復字仲庶興國永興人第進士歷臺諫有直聲以天章閣待制知澤州又爲河東都轉運使熙寧中卒

張之才字次文遼人紹聖初爲陽城令清謹愛民名聞當世去官日辭湯廟詩云一官來此四經春不負蒼天不愧民神道有靈應信我去時猶似到時貧邑人溫光刻石頌之

宋昌言趙州平棘人以蔭爲澤州司理叅軍州有殺人獄昌

言疑其寃堅請緝捕後果得真犯者仕至少府監卒
李景章崇寧中知澤州才識卓越善政宜人民咸德之
董沔任陵川令忠於謀國切於愛民有學識抗疏罷毀淫祀
呂由庚任陵川令能興教化士風丕變提刑學士黃公廉以
詩寵之祀名宦

呂公孺任澤州刺史廉儉自持不妄交遊歷戶部尚書
時敦彭門人任澤州判官政事詞翰推重一時
王士言靖康中往河東防秋金人攻澤州士言畢力守禦金
兵日增城陷巷戰死事聞贈忠州團練使

金

劉敏行平州人天會三年進士爲高平令縣城圯壞久不修
盜橫恣掠縣鎮不能禦敏行出已俸率僚吏出錢雇役繕

治百姓欣然從之凡用二千人版築遂完鄉村百姓入保
賊至不能犯累遷河北東路轉運使卒

左秘薊州人太師企弓之子皇統初爲澤州刺史廢一切鈎
距細苛不嚴而治刑獄猥積決遣無留平南山盜革守城
繁役秋糧納粟請折以米費省不貲歷政三年清儉自處
吏畏民安綽有政聲

王庭直天眷間知高平縣劇盜蜂起庭直悉力集事修濬城
隍民恃無恐

魏繼隆天會間任陵川令首重學校嘉惠良民
李仲略高平人文簡公子幼敏悟善屬對大定間官至都曹
以父老乞歸特授澤州刺史蒞政剛介特立不阿權勢值
歲歉發倉賑濟後自劾以聞上嘉之賜勅獎慰

許安仁字子靜獻州交河人善屬文登大定七年進士第明昌四年以左補闕諫幸金蓮川疏奏罷幸出爲澤州刺史作無隱論上之凡十篇皆切中時務在郡二年徙同知河南府陞汾陽軍節度使致仕卒謚文簡安仁質實無華澹然有古君子風

張恪開封人大定間爲陽城令清靜簡易寬而能斷民樂其化爲立去思碑祀名宦

察剗吾歌泰和間以安遠大將軍行高平令仁而能斷和易不苛剗劇撥繁雖纖悉罔有滯者懲奸化暴遠近俱安

郭質泰和間爲高平令識度深遠操履方潔葺學校繕城垣卹民興教扶善鋤惡民爲立祠

田居敬陵川令廉明正直勤撫字樂教誨有瑞麥嘉禾之祥

楊廷秀華州人官司諫泰和初自獻州刺史移刺澤州政平訟理民用康乂雅善文辭註程楊易傳行於世自號虎峰居士陞平涼府同知

元

關世傑字英甫晉寧人至元四年由兩臺掾薦舉爲陽城尹大布恩信勸課農桑講明彛教士民聞風嚮義爲立德政碑頌之

周克明字文舉清苑人至元四年主簿陽城縣政尚寬簡禱雨有應民爲立碑祀名宦

段直字正卿澤州晉城人至元十一年河北河東賊起直聚鄉黨族屬結壘自保世祖命將略地晉城直以衆歸承制署潞州元帥府右監軍其後論功行賞分土世守命直佩

金符爲澤州長官澤民多避兵未歸者直命籍其田廬於親戚隣人之戶且約曰俟業主至當析而歸之後逃民多來還命歸其田廬如約民得安業素無產者則出粟賑之爲他郡俘掠者出財購之兵死暴露者收瘞之未幾澤爲樂土大修孔子廟割田千畝置書萬卷迎儒士李俊民爲師以招延四方來學者不五六年士子以通經被選百二十有二人在官二十年多惠政特命提舉本州學校事未拜卒子紹隆嗣長官興學校平版籍民多賴之

劉好德至元間爲高平令兼勸農事有治劇才舉廢墜招流亡重建學廟正祀考曰理殘邑而飭振從宜招遺黎而撫安復業創興黌宮以惇俗而導民蓋得爲政之先務者李裕大德間以才名薦爲陽城令初下車卽問民疾苦勸農

桑興學校邑人德之祀名宦

韓汝弼字良輔保定人至順元年爲陽城縣尹興廢舉墜汰冗食罷不急變士風善民俗早禱輒應連歲大稔邑人立碑頌之

路有讓字文遠廣平人至正三年爲陽城縣尹有異政崇儒恤災化行訟簡

趙繩祖字嗣宗燕山人至正十一年爲陽城縣尹立政敷教恩布威行民懷其德刻碑以頌

葉企顏上蔡人至正間以統軍元帥知翼城縣事擢知澤州撫育民生惠澤遠被興學造士茂著聲稱

普顏帖木兒一名不花至正間爲澤州達魯花赤兼諸軍與魯事勸課農桑作興學校嚴信牌辨冤抑讞獄於民教以

孝弟節義民多感悅

李鎔山東人至正間由河東運司遷沁水簿築室城南石樓山延絳人郭晉以道德文章率諸生一時士習丕變雖兒童婦女皆趨教化

陳榮祖密縣人至正間任沁水縣尹時兵戈雲擾百姓匿巖穴中下車首以撫綏為任示以恩信民漸復業尤留意風教增置學田若干畝

張輔銅鞮人由高平論至正間擢陵川尹時破頭潘先生自鄴攻潼關兵臨縣城城陷力竭不屈死

明

李祥湖廣人洪武初以人才舉知澤州時干戈甫定城郭蕭然乃建州治修學校民不知勞招集流移延師訓教境內

稱治云

鄭可權睢州人洪武間任澤州學正文行俱優兩主山西鄉試

李芾鄧州人洪武間知陽城縣建壇廟修學校勸課農桑愛民如子凡事務求節費時多興作民不知擾既去民思之方渭正定人洪武間陽城主簿佐縣令李芾以治聞宋文恪學記云俾無忘二侯之德

王堅福州人洪武間以人才知澤州作興學校整修廟社化民有方蒞事勤慎州人稱之

王珪洪武間知陽城縣建養濟院惠民藥局及倉廩多惠政陳德南直鳳陽人洪武間沁水丞明初修治城垣公廨廟學壇壝鋪舍其功甚多

劉以文黃岡人永樂間以溫州府照磨擢陽城令明於政體不矯飾爲廉不姑息爲惠歷九載民乞留加爵二級又九載治行優優化洽於民及致仕去民慕之不忘

李希文寧州人永樂間高平丞以廉勤著嘗祛虎害民德之陞福建市泊提舉副使

王憲鄆縣人宣德初知陵川縣政平訟簡民賴以安及代去民遮道送之

張瓛揚州人正統間以舉人任沁水教諭通五經尤邃於詩嚴於誨人以憂去服闋補鎮平縣沁諸生上疏爭之

任通易州人景泰間以舉人知陵川縣修廢振墜勞績茂著有遺惠於民

甯靖湯陰舉人成化間由蘇州推官知澤州清慎之操終始

如一民有訟者必反復譬喻使之自改不輕笞一人祀名宦

陸偉字仲奇錢塘人成化乙酉鄉薦授澤州知州時州洊饑請發帑賑救全活以數萬計所行一切守法請託不行強禦不畏寧山衛軍民雜處久不靖懾以德威彼此帖然葺州治脩倉儲興儒學脩明道先生祠民甚懷之致仕歸卒年八十九

張晟成化間知高平縣簡易鎮靜不事表暴邑俗民無貴賤喜音樂晟下令禁止四境肅清革淫祀民服其化停雜役民安其生

史書字獻忠靈臺人成化間以進士任陽城縣知縣時年甚少大猾路省祭頗輕之會新縣門其家人取餘木以去命

逮之路至厲聲曰木無幾耳遂足煩簡書耶書曰木卽無
論多寡亦論公私若爲吏熟習律例獨未知常人盜官物
尚以徒論耶路默然因叱左右箠殺之閭縣皆驚在任清
慎自勵愛民如子再知平山以治行擢吏部

狄宗文寧州人成化間以舉人知沁水縣抑強植弱禁令畫
一以剛廉著聲

劉一清陳州人成化間任陽城教諭禔修正教勤業惜時能
以矩矱約束諸生居九載講授不倦士論歸之陞黎城知
縣

毛忠掖縣人弘治間以舉人知高平縣時凶荒甫息民力凋
瘵悉心撫綏崇重文學政教兼舉時廢弛之餘多建置而
民不以爲擾

楊子器慈谿人弘治間以進士任高平縣知縣嚴重有威望
會詔遷民兵實邊抗言不便狀事得寢盜殺人取資去其
父疑逆旅主人力白其寃尋得實乃所賃騾夫也論如律
設鄉校七十所時進諸生論文藝禁喪祭用僧道俳優又
以其暇創邑志去官後越十八年民祀諸建寧鎮聖廟之
東廡安陽崔銑有記累官河南布政司

孫磐遼東人弘治間以進士知陵川縣抑豪強恤孤弱使貧
富各得其所尤殫心風教窮鄉徧立社學集養正篇小四
書養蒙大訓悉爲刊布之

李智曹縣人冢宰秉子弘治間以舉人知澤州公恕廉勤抑
暴扶良聲名藉甚士民思之

蔡深弘治間陽城訓導勤於教人樂育不倦以戴記授學者

迄今相傳不泯

王輔長安人弘治間知沁水縣奉公守法吏畏民懷

楊範洛陽人弘治間以舉人知沁水縣均賦役興學校治邑六年擢正定府通判去之日囊橐蕭然民涕泣攀留不忍舍去

楊壘禹城人弘治間以舉人知陵川縣誠心撫字政尚寬平緩徵均徭時有慈母之頌

楊恭永清人弘治間以進士知高平縣博學有器量守正不阿人歌愷悌未久卒邑人痛之

馬汝驥字仲房綏德人正德十二年進士授編修以諫南巡特調澤州知州王府人魚肉小民將法懲之王以書來屬輒投櫝中不視陵川知縣貪欲黜之巡按御史爲曲解不

聽竟褫其官世宗初召復編修累晉禮部右侍郎卒贈尚書謚文簡

崔哲遼陽人正德間以進士知澤州撤淫祠廣儲蓄尤愛獎進後學課試皆有程期

王鍵永平人正德間知澤州革除宿弊剖決如流人服其敏龔進高安人正德間以進士知高平縣禁止令行政平訟理人以神明號之陞刑部主事

魏繼盛涇州人正德間知陵川縣政教兼舉吏畏民懷

王溱直隸開州人正德間以進士知沁水縣性明達持法嚴謹遭亂後增修城郭安集人民陞御史出爲平陽知府

董琦陽信人正德間以進士知高平縣饒有吏材練習民事巡阡陌間察勤惰而董戒之或耕歛不足輒捐俸以給又

山西通志 卷九十一
三
爲定婚儀品節至今遵守當時爲之謠與前令楊子器並稱

孫應奎字文宿洛陽人正德十六年進士嘉靖中戶科左給事中十一年同官王準嘗劾張璉桂萼計典謫典史應奎言吏部尚書汪鋐陰爲璉萼乞復官而責鋐吏部尚書王瓊代鋐亦言準宜黜乃謫應奎高平縣丞恤民造士邑多翼戴後仕至戶部尚書致仕卒

孫紹先來陽人嘉靖間以貢知陵川縣剛明正直鋤強剔弊敷教造士節愛宜民有生祠德政碑

李麒涇州人嘉靖間以舉人知陵川縣平易近民寬猛得宜勸農桑賑飢乏人咸德之

王朝雍朝邑人嘉靖間舉人以嚴州推官擢知澤州存心寬厚政理訟平歷三載人蒙其惠適巨寇陳卿據青羊山詣賊中諭以禍福順逆之理賊衆屈服後竟剿平之百姓安堵擢懷慶府同知

王進賢德州人嘉靖間以舉人知沁水縣才識疏暢迥有風力吏畏其威民樂依賴居二載以憂早疾作卒遠近悲號如喪考妣立祠端氏鎮祀之

王準儀衛司人嘉靖間以進士知高平縣蠲不急之務緩無名之徵扶植寡弱救民疾苦嚴禁侵漁豪右斂手三年以治行徵去之日囊無餘貲

張卣儀封人嘉靖間以進士知高平縣性明敏案無留牘邑無冤民敷政三載百廢俱舉所立堂規至今猶爲遵守陞給事中民立祠祀之

楊縉壽張人嘉靖間以進士知翼城縣調陽城廉節自持寡交接政尚平易緩催科而勤撫字有古循良風

王傳高陵人嘉靖間以進士知陽城縣沉靜寡言望之如神明雅愛士類校課悉有程積穀數萬石凶歲民賴以濟居四年未嘗輕取一介民歌頌之

孫文澤鄒平人嘉靖間以監生任陽城縣主簿小心謹慎嘗考邑戎鹽諸務廉得弊端力爲釐正編審賦役民無貧富悉稱平遇旱禱雨如注

李蓼內鄉人嘉靖間以檢討謫陽城丞日事翰墨政事不廢陞大名推官

王標壽州人嘉靖間陽城典史蒞任未幾剿賊遇害百姓惜之祀名宦

劉廷儀慈溪人嘉靖間以進士知陵川縣公廉強毅不畏權勢蒞政恩威並著捕盜均賦興學造士具有成績而自奉儉約飲食澹若寒素陞監察御史

李棟涉縣人隆慶間以進士知陽城縣愷悌慈祥明敏果斷居三載以循良卓異賜宴禮部擢山東道御史民立二祠祀之

周詩更姓單河南固始人隆慶間以舉人知沁水縣清慎和易約已惠民陞戶部主事歷官雲南永昌知府

許維新堂邑人萬曆間知澤州仁慈愷悌簡約淡素先教化而後刑罰緩催科而善聽斷獎借士類惠愛百姓去之日士民老幼遮留三日始得出境所在尸祝有生祠去思碑王所用字賓吾河南懷慶人萬曆間以進士任澤州知州澤

俗故剛悍又多藩府所用馭以寬大豪強者初易視之久
悉馴服嘗引訟者至膝前俾盡言徐爲開陳利害各和解
以去張自安等二十人已定擬矣廉知其寃力爲湔雪崇
學校興教化修張公書院建東西學舍集一州四縣士肄
業其中復以時察其勤惰後陞任去士民建生祠祀之
鹿久徵定興人萬曆中進士爲襄垣知縣擢御史時以軍政
事貶黜言官三十四人久徵抗疏申救亦謫澤州判官後
遷知縣卒

賀盛瑞獲嘉人萬曆間官工部爲內監中傷備兵郵延遷澤
州樸誠清正不畏強禦作興學校請減稅糧修城垣裁冗
費清驛站均收納禁淫祀獎節義盡心民社不辭勞怨以
疾歸囊篋蕭然士民思之有生祠德政碑

劉一相長山人萬曆間以進士知高平縣政適寬嚴學綜經
史文章吏治推重一時陞給事中

劉應奇中牟人萬曆間以進士知陽城縣清慎謙和一毫不
苟取歷六載囊橐蕭然陞吏部主事去日民攀留者數萬
人立祠祀之

王雅量費縣人萬曆間以進士知陽城縣有惠政士民德之
陞廣東道御史按關中道出邑內邑人士無貴賤老幼深
山窮谷爭迎道左如見慈母官至光祿寺鄉祀名宦

宗思涇陽人萬曆間以貢授澤州學正鹽使者謁廟以雨將
拜於堂上思抗聲曰拜下禮也御史肅然復其位又捐俸
修學宮月課諸生親自甲乙不少爽後遷肅府教授王師
事之

山西通志 卷九十六 七
任大僚高陵人萬曆間以進士知襄垣調高平才能敏捷禁
豪猾雪冤獄人咸悅服祀名宦

張應詔咸陽人萬曆間以舉人知陽城縣鑿澄有長才創甃
城修學宮清地畝百度具舉陞御史

王象蒙新城人萬曆間以進士知陽城縣性精明行以渾厚
崇學校課農桑遇旱禱雨卽應善政不可枚舉陞御史

王良臣新鄭人萬曆間以舉人知陽城縣沉毅有遠略清操
介守愛民如子修學校勸農桑百廢具興陞河間府同知
有去思碑

熊偉商城人萬曆間以進士知陽城縣誅鋤強暴優禮譽髦
令行禁止吏畏民懷

李士登洛陽人萬曆間以進士知陵川縣冲齡筮仕諳吏治

威惠並施尤作興學校歷官布政使

雍獻策睢州人萬曆間以舉人知陵川縣存心仁愛行政公
平士民思之

張汝濟通州人萬曆間以舉人知陵川縣德政清操爲一時
推重

曲遷喬山東長山人萬曆間以進士知沁水縣肫誠惇大獎
拔才雋陞工科給事歷官順天府尹

田景新貴州人泰昌間以進士知高平縣寬平簡易清驛遞
減租賦爲德於民甚厚未幾調陽曲民立祠祀之

張自蘊卽墨人天啓間以舉人知陵川縣德性仁慈器度恢
弘鋤抑強豪興起斯文調介休

董之表山東陽信人天啓間以舉人知沁水縣清謹仁恕去

山西通志 卷九十六 郡 任父老子弟遮留號泣二百里絡繹不絕陞晉州知州鞏昌府同知

黃圖昌字九如山東沂州人崇禎間以進士任澤州知州徵收賦役有以羨投者榜示之悉抵次限正供課士論文甲乙纖毫不爽又捐俸建魁樓於巽地庚午州雋五人元亦出屬縣論者咸歸功焉尋以艱去士民泣送百餘里不絕相傳爲明三百年第一云

楊鎮原字中岳陳州人崇禎二年知陽城縣爲治簡穆行所無事壬申秋賊犯邑東募壯勇斬獲甚衆旣而賊益剽掠客兵往來如織且稜疫頻仍鎮原剗羅城葺垣墻築砦堡整保甲集器械火礮給糧糗芻茭施醫藥至鬻家業以佐軍建樓於城西北晝夜寢處其中與寇退相終始擢戶科

給事中民立祠祀焉邑太宰張慎言撰碑記累遷河東道左叅議卒葬邑南壇側民歲時祀之知縣項龍章又加封樹命歲清明官備牲醴致奠著爲令

焦鰲崇禎間以貢士任沁水縣知縣流寇自晉入豫自豫返晉沁水實當其衝鰲督士民嬰城固守力屈死之

國朝

袁仲選遼東人順治七年以貢知澤州姜逆之變州城爲賊據仲選泣任先遣牌具言大同破姜逆授首狀賊黨遁乃驅車徑入招流亡安反側閭井晏然及大兵至以澤從賊議屠之仲選哀請再四繼以泣尋復以百口保之主者曉澤人曰吾以爾使君免爾死爾其服使君教以無忘朝廷之德澤人歡呼曰不敢忘後遷潞安知府祠建澤城中

山西通志 卷九十一
祭祀至今不絕

李向禹鐵嶺人順治五年以貢生任陵川縣知縣姜逆之亂兵臨城下妻王氏謂向禹曰君職守土宜竭力報國慎無以家爲念向禹頷之率家僮馳出王遂自縊二女暨婢從死城旋破賊執向禹誘之降復怵以兵卒不屈夫婦節義不愧前賢

劉廣國湖廣潛江人順治九年以進士知高平縣時姜逆初平高平雖壯邑凋瘵殊甚廣國首革賠補搜索諸弊正供外不費民一錢澤隸縣貢紬數殊夥輸納費不貲力詳直指獲

題請減勸農桑修學宮循聲茂著卒於官邑人胥爲流涕范繩祖順治間知高平縣廉直剛斷能任大事察地方利害

興除之均徭役革衙蠹完先師廟大工建城隍廟繕城築堤創祠修署治行爲一時最

白良玉四川梓潼人康熙六年以舉人知高平縣有清操正供耗銀舊規寢及半良玉秒忽不多取櫃書有貼條例里歛百金嚴禁之機戶受價織造官多蝕尅又繇潞覈驗費不貲良玉核發正價且請繇縣解部機戶以甦驛馬草豆向令牙行辦理良玉檄委兩丞於秋冬平價採買民不爲病舊俗訟負者繳贖緩和者納息穀首除之又禁淹柩藏窀穸者凡一萬五千有奇高平人嘗集其治行勒諸石又請擴署舍力禁之而不能止八年行取入都貧不能舉火比卒高平列於朝者釀錢以賻乃克殮

張都甫河南延津人康熙八年以進士知陽城縣性簡厚以

清廉自勵而達於土俗人情興舉胥中其以訟來者片言輒抉情僞如指掌人不敢欺涖官十二年清慎如一日以治行入爲監察御史

梅建字啖熊貴州普定人康熙年以舉人知高平縣性廉介精於吏治發奸摘伏不少爽建宗程書院集雋異其中時授以文義又立義學俾寡人子胥得誦詩書後解組去高平人建祠祀之

蒲州府

漢

季布楚人尚氣任俠有名於楚孝惠時爲中郎將折上將軍樊噲語尤直爲河東守孝文時人有言其賢者上召欲以爲御史大夫復有言其勇使酒難近至留邸一月見罷季

布進曰臣無功竊寵待罪河東陛下無故召臣此人必有以臣欺陛下者今臣至無所受事罷去此人必有以毀臣者夫陛下以一人之譽而召臣一人之毀而去臣臣恐天下有識聞之有以窺陛下也上默然良久曰河東吾股肱郡故特召君耳布辭之官

番係武帝時爲河東守言漕從山東而西歲百餘萬石更砥柱之險敗亡甚多而亦煩費若穿渠引汾溉皮氏汾陰下引河溉汾陰蒲阪下度可得五千頃五千頃故盡河壩棄地民菱牧其中耳今溉田之度可得穀二百萬石以上穀從渭上與關中無異而砥柱之東可無復漕天子以爲然發卒數萬人作渠田數歲河移徙渠不利田者不能償種久之河東渠田廢而穿渠引汾溉皮氏汾陰引河溉汾陰

蒲阪今永濟河津滎河水利多本於係

田延年字子賓由齊徙陽陵以材略給事大將軍幕府霍光重之出爲河東太守選拔尹翁歸等以爲爪牙誅鉏豪強奸邪不敢發以選入爲大司農會議昌邑王事衆莫敢發言延年按劔廷叱羣臣卽日議決宣帝卽位封陽城侯二年自殺

閔孺爲河東太守田延年督郵孺部汾北尹翁歸部汾南所舉應法得其罪辜屬縣長吏雖中傷莫有怨者

黃霸字次公淮陽陽夏人少學律令喜爲吏領郡錢穀計簿書正以廉稱察補河東均輸長復察廉爲河南太守丞擢潁川太守治爲天下第一五鳳三年爲丞相封建成侯霸材長於治民及爲丞相功名損於治郡時然自漢興言治

民吏以霸爲首甘露三年卒謚曰定侯

周堪字少卿齊人元帝卽位太傅蕭望之爲前將軍少傅周堪爲諸吏光祿大夫皆領尚書事甚見尊任爲許史及弘恭石顯所讚愬三年望之自殺乃擢堪爲光祿卿堪弟子張猛光祿大夫給事中大見信任恭顯憚之數譖毀焉堪性公方自見孤立遂直道而不曲是歲夏寒日青無光恭顯及許史皆言堪猛用事之咎上左遷堪爲河東太守猛槐里令顯等專權日甚後三歲餘孝宣廟闕災其晦日有蝕之於是上召責諸前言日變在堪猛者下詔徵堪詣行在所拜爲光祿大夫秩中二千石領尚書事猛復爲太中大夫給事中而顯幹尚書五人皆其黨堪希得見疾瘖不能言而卒

蕭咸東海蘭陵人望之子也舉茂材累遷河東太守所居有政迹數增秩賜金後至大司農終官

鄧禹字仲華南陽新野人年十三游學京師見光武知非常人遂相親附及光武安集河北禹杖策見之因進說延攬英雄務悅民心立高祖之業救萬民之命光武大悅常宿止於中與定計議赤眉西入關更始使定國上公王匡襄邑王成丹抗威將軍劉均及諸將分據河東弘農以拒之赤眉衆大集王匡等莫能當光武籌赤眉必破長安欲乘釁并關中而方自事山東未知所寄以禹沉深有度故授以西討之略乃拜爲前將軍持節中分麾下精兵二萬人遣入關令自選偏裨以下可與俱者於是以韓歆爲軍師李文李春程慮爲祭酒馮愔爲積弩將軍樊崇爲驍騎

將軍宗歆爲車騎將軍鄧尋爲建威將軍耿訢爲赤眉將軍左于爲軍師將軍引而西建武元年正月禹自箕關將入河東河東都尉守關不開禹攻十日破之獲輜重千餘乘進圍安邑數月未能下更始大將軍樊參將數萬人度大陽欲攻禹禹遣諸將逆擊解南大破之斬參首於是王匡成丹劉均等合軍十餘萬復共擊禹禹軍不利樊崇戰死會日暮戰罷軍師韓歆及諸將見兵勢已摧皆勸禹夜去禹不聽明日癸亥匡等以六甲窮日不出禹因得更理兵勒衆明日匡悉軍出攻禹禹令軍中毋得妄動旣至營下因傳發諸將鼓而並進大破之匡等皆棄甲亡走禹率輕騎急追獲劉均及河東太守楊寶持節中郎將弭彊皆斬之收得節六印綬五百兵器不可勝數遂定河東承制

拜李文爲河東太守悉更置縣屬令長以鎮撫之是月光武卽位於部使使者持節拜禹爲大司徒策制詔前將軍禹深執忠孝與朕謀謨帷幄決勝千里孔子曰自吾有回門人日親斬將破軍平定山西功效尤著百姓不親五品不訓汝作司徒敬敷五教在寬今遣奉車都尉授印綬封爲鄴侯食邑萬戶敬之哉禹時年二十四遂渡汾陰河入夏陽復破走更始左輔都尉兵建武二年更封爲梁侯十三年定封高密侯食四縣顯宗卽位拜爲太傅永平元年年五十七卒謚曰元侯

丁邯字叔春京兆陽陵人有高節正直不撓建武初舉孝廉不肯爲尚書郎後拜汾陰令治有名跡遷漢中太守

劉祐字伯祖中山安國人察孝廉累遷河東太守時屬縣令

長率多中官子弟百姓患之祐到黜其權強平理冤結政爲三河表後爲河南尹陳竇敗黜歸卒於家

史弼字公謙陳留考城人少篤學爲平原相詔書下舉鈞黨獨無所上遷河東太守被一切詔書當舉孝廉弼知多權貴請託乃豫勅斷絕書屬中常侍侯覽果遣諸生齎書請之并求假鹽稅積日不得通生乃說以他事謁弼而因達覽書弼大怒曰太守忝荷重任當選士報國爾何人而僞詐無狀命左右引出楚捶數百府丞掾史千餘人皆諫於廷弼不對遂付安邑獄卽日拷殺之侯覽大怨遂詐作飛章下司隸誣弼誹謗檻車徵吏人莫敢近者唯前孝廉裴瑜送到崤澠之間大言於道旁曰明府摧折虐臣選德報國如其獲罪足以垂名竹帛願不憂不懼弼曰誰謂荼苦

其甘如薺昔人刎頸九死不恨下廷尉詔獄減死罪一等
論輸左校閉門不出數爲公卿所薦議郎何休訟弼有幹
國之材宜登台相徵拜議郎爲彭城相卒

王邑字文都北地涇陽人爲河東太守興平二年帝幸安邑
邑奉獻綿帛悉賦公卿以下封邑爲列侯

趙無忌字世卿京兆長陵人岐次兄也部河東從事爲宦官
黨京兆尹唐瓘所殺

焦贛山陰人嘗爲河東太守鄭弘之師也

魏

任嘏字昭先樂安博昌人文帝時累遷河東太守所在化行
有遺風餘教嘏爲人淳粹凱弟沉默潛行著書三十八篇
卒後故吏河東上官崇等奏之詔下秘書以貫羣言

杜恕字務伯京兆杜陵人畿子明帝末爲河東太守歲餘遷
淮北都督恕所在務存大體而已其樹惠愛得百姓歡心
不及於畿

嚴幹字公仲馮翊東縣人以孝廉拜蒲坂令病去官後追錄
前討郭援功封武鄉侯

游楚馮翊人爲蒲阪令性慷慨以恩德爲治不好刑殺遷漢
興太守

徐英馮翊人爲蒲阪令剛爽不撓嘗鞭小吏張旣旣後貴顯
欲與英和解乃因醉狎之英抗志不納遂不用

王濬字士治弘農湖人博涉墳典疏通亮達恢廓有大志辟
河東從事守令有不廉潔者皆望風自引而去刺史徐邈
以女妻之後叅鎮南軍事以平吳功封襄陽侯邑萬戶卒

山南通志 卷九十一 名宦 謚武

晉

劉原渤海人河東太守好奇以旌才爲務郡人馮收荐猗氏王接於原原卽加禮命接以母老辭乃止

鄧攸字伯道平陽襄陵人河東太守

路述爲河東太守劉淵寇河東述戰死

北魏

尹敬代人少勇健走及奔馬曳牛却行賜爵汾陽子世祖嘗問其欲敬曰中秘二省多諸文士若恩矜不已請參其次世祖賢之拜秘書監以功晉魏安侯後出爲東雍州刺史恩化大行百姓思之又晉河南公累遷司空太安五年卒游雅字伯度廣平任人也少好學有高才與渤海高允等俱

知名徵拜中書博士累遷太子少傅封廣平侯出爲平南將軍東雍州刺史在任廉白甚有惠政和平二年卒謚曰宣

裴安祖河東聞喜人弱冠州辟主簿民有兄弟爭財詣州相訟安祖召其兄弟以禮義責讓之兄弟明日相率謝罪內外欽服之後高祖幸長安安祖朝於蒲坂高祖與語甚悅拜安邑令以老病固辭詔給一時俸以供湯藥焉年八十三卒

薛謹河東汾陰人彊孫也父辯將歸國謹自彭城來奔朝廷嘉之授河東太守後襲爵平西將軍汾陰侯謹所治與屈丐連接結士抗敵甚有威惠始光中詔奚斤伐赫連昌敕謹領偏師前鋒鄉導旣克蒲坂世祖以新舊之民并爲一

郡謹仍爲太守將軍如故詔與鎮南將軍奚眷討平山胡
白龍除安西將軍涪陵公刺史如故太延初征吐沒骨平
之謹自郡遷州威惠兼備風化大行時兵荒之後儒雅道
息謹命立庠序教以詩書三農之暇悉令受業躬巡邑里
親加考試於是河汾之地儒道興焉真君元年徵還京師
五年以北討後期斬尋贈鎮西將軍秦雍二州刺史謚元
崔衡字伯玉清河人襲父寬爵武陵公太和中以鎮西將軍
除秦州刺史先是河東年饑劫盜大起衡至修龔遂之法
勸課農桑周年之間寇盜止息十二年卒謚惠

崔遊字延叔博陵安平人少有風概釋褐奉朝請熙平末轉
河東太守郡有鹽戶常供州郡爲兵子孫見丁從役遊矜
其勞苦乃表聞請聽更代郡內感之太學舊在城內遊乃

移置城南閑敞之處親自說經當時學者莫不勸慕號爲
良守後除南秦州刺史爲城人所害

西魏

韓杲武川人西魏大統初爲河東郡守性倜儻激烈爲政尚
寬簡吏民懷之

元淑河東郡守也民謠曰秦州河中杼柚代春元公至止田
疇始理

北齊

韓軌字伯年太安狄那人齊獻武王鎮晉州引爲鎮城都督
贊成大策封平昌縣侯仍督中軍從破爾朱兆於赤洪嶺
再遷秦州刺史甚得邊和獻武巡秦州欲以軌還仍賜城
人戶別絹布兩匹州人田昭等七千戶皆辭不受唯乞留

軌獻武嘉歎乃留焉頻以軍功晉封齊受禪拜大司馬卒謚肅武

潘樂字相貴廣寧石門人齊神武出牧晉州引樂爲鎮城都將累以軍功拜東雍州刺史神武嘗議欲廢州樂以東雍地帶山河境連胡蜀形勝之會不可棄也遂如故齊受禪封河東郡王拜司徒天保元年十一月周文東至峭陝遣其行臺侯莫陳崇自齊子嶺趣軹關儀同楊惲從鼓鐘道出建州陷孤公戍詔樂總大衆禦之樂晝夜兼行至長子遣儀同韓永興從建州西趣崇崇遂遁六年卒於懸瓠贈假黃鉞太師

韓果代武川人少善騎射被甲荷戈升陟峰嶺猶涉平路所行之處山川形勢備能記憶兼善伺敵虛實有潛匿溪谷

者果登高望之所疑處往必有獲繇是爲虞侯都督遷朔州刺史大統九年除河東郡守從大軍破稽胡於北山胡地險阻人迹罕至果進兵窮討散其種落稽胡憚果勁健號爲著翅人太祖聞之笑曰著翅之名寧滅飛將封褒中郡公周武成二年又率軍破稽胡大獲生口賜奴婢一百口建德初卒

慕容儼字恃德清都成安人虜之後也爾朱敗歸高祖以勲累遷安東將軍高梁太守東雍州刺史沙苑之敗西魏荊州刺史郭鸞率衆攻儼拒守二百餘日晝夜力戰大破鸞軍斬首三百餘級又擒西魏刺史郭他時諸州多有翻陷唯儼獲全晉號鎮南將軍武定三年從攻玉壁賜帛七百匹并衣帽等齊天統二年別封猗氏縣公五年晉義安王

山西通志 卷九十六
武平中卒

北周

宇文深測弟性鯁正有器局年數歲便累石爲營伍折草作旌旗及長好讀兵書從孝武入關齊神武屯蒲坂分遣其將趣潼關高敖曹圍洛陽太祖將襲秦諸將咸難之太祖乃隱其事陽若未有謀者而獨問策於深對曰竇氏歡之驍將也頑凶而勇戰亟勝而輕敵歡每仗之以爲禦侮今者大軍若就蒲坂則高歡拒守竇泰必援之內外受敵取敗之道也不如選輕銳之卒潛出小關竇性躁急必來決戰高歡持重未卽救之則竇可擒也旣擒竇氏歡勢自阻回師禦之可以制勝太祖喜曰是吾心也軍遂行果獲泰而齊神武亦退又說太祖進取弘農復克之太祖大悅曰

君卽吾家之陳平也是冬齊神武又率大衆度河涉洛至於沙苑諸將皆有懼色惟深獨賀太祖詰之曰賊來克斥何賀之有對曰高歡之撫河北甚得衆心雖乏智謀人皆用命以此自守未易可圖今懸師度河非衆所欲唯歡耻失竇氏復諫而來所謂忿兵一戰可以擒也此事昭然可見不賀何爲請假深一節發王羆之兵邀其走路便無遺類矣太祖然之尋而大破齊神武軍如深所策六年監李弼軍討白額稽胡有戰功封長樂縣侯歷東雍州別駕使持節大都督東雍州刺史深爲政嚴明示民以信抑挫豪右吏民懷之周初晉安化縣公卒謚成康

李遠字萬歲家高平幼有器局太祖令居麾下封安定縣伯晉公又晉陽平郡公時河東初復民情未安太祖謂遠曰

河東國之要鎮非卿無以撫之乃授河東郡守遠敦獎風俗勸課農桑肅遏姦匪兼修守禦之備曾未朞月百姓懷之太祖嘉焉降書勞問徵爲侍中後除尚書左僕射周孝閔踐阼以子植謀誅晉公護護逼令自殺護誅謚曰忠柳帶韋字孝孫解人少好學與諸父慶蚪檜歸西魏廢帝元年爲解縣令二年加授驃騎將軍左光祿大夫明年轉汾陰令發摘奸伏百姓畏而懷之周建德五年陳王純出并州以帶韋爲并州司會并州總管府長史六年卒於位謚愷

隋

王隆龍門人文中子父開皇時爲樂昌猗氏銅川三邑令有善政又芮城府君文中子兄史失其名卽中說內所謂王

君者也

陸逢爲蒲關吏文中子出自蒲關逢止之曰未可以遜我生民也文中子爲之宿翼日而行逢送之曰行矣江湖鱣鯨非溝瀆所容也

楊處綱高祖族父開皇初襲封義城縣公在官彊濟爲時所稱拜蒲州刺史吏民悅之卒謚恭

楊弘字辟惡高祖從祖弟開皇初封河間郡王進位上柱國拜蒲州刺史得以便宜從事時河東多盜賊民不得安弘奏爲盜者百餘人投之邊裔州境帖然號良吏每晉王廣入朝弘輒領楊州總管及晉王歸藩弘復還蒲州在官十餘年風教大洽大業初徵還拜太子太保卒追封郇王楊尚希弘農人高祖拜度支尚書進爵爲公尚希性弘厚兼

以學業自通有雅望爲朝廷所重上每旦臨朝日昃不倦尚希諫以宜舉大剛繁務非所宜親上懼然曰公愛我尚希素有足疾上謂曰蒲州出美酒足堪養病屈公卧治之於是出爲蒲州刺史在州甚有惠政復引瀆水立隄防開稻田數千頃民賴其利

高義明渤海人仁壽末蒲州長史漢王諒舉兵河東豪傑以城應諒刺史邱和遁歸關中義明謂司馬榮毗曰河東要害國之東門若失之則爲難不細城中恟恟非悉反也但收桀黠者十餘人斬之自當立定耳毗然之義明馳馬追和將與協計至城西門爲反者所殺

榮毗字子諶北平無終人周歷內史下士隋仁壽中累拜蒲州司馬漢王諒舉兵河東豪傑多以城應之刺史邱和遁

歸關中毗與長史高義民議追和拒守未幾義明爲反者所殺毗被執諒平拜治書侍御史卒贈鴻臚少卿

堯君素魏郡湯陰人大業末累拜鷹擊郎將從驍衛大將軍屈突通拒唐兵於河東俄而通引兵南遁以君素有膽略署領河東守唐師攻之不克遣通至城下呼之君素歔歔流涕悲不自勝左右皆哽咽通亦泣下言宜早降君素曰公當爪牙之寄爲國大臣國祚隆替懸之於公奈何不思報效以至於此通曰我力屈而來君素曰方今力猶未屈何用多言通慙而退時圍甚急行李斷絕乃爲木鷲置表於頸具論事勢浮之黃河沿流而下河陽守者得之達東都越王侗見而歎息承制拜金紫光祿大夫密遣行人勞苦之監門直閤龐玉武等歸唐俱造城下爲陳利害又賜

山西通志 卷九十七 名宦
金券待以不死君素卒無降意其妻又至城下謂之曰君何自苦身取禍敗君素曰天下事非婦人所知引弓射之應弦而倒君素善於統領堅守歲餘糧食乏絕又徵知江都狀遂爲左右所害

辛仲龕狄道人爲猗氏令溫厚不苛祀名宦

唐

賀德仁越州山陰人以學行稱大業末河東司法唐初累授洗馬貞觀初轉趙王友卒

姜晦秦州上邽人柔遠子起家蒲州參軍歷巡邊使吏部侍郎歷任有聲終海州刺史

唐臨京兆長安人貞觀初爲萬泉丞縣有輕囚十數人會春暮時雨臨白令請出之令不許臨曰明公若有所疑臨請

自當其罪令因請假臨召囚悉令歸家耕種與之約令歸繫所囚等皆感恩貸至時畢集詣獄歷御史大夫卒

杜楚客如晦弟京兆杜陵人隱嵩山貞觀四年召拜蒲州刺史甚有能名坐魏王尋授處化令

薛萬徹咸陽人貞觀十七年爲蒲州刺史於虞鄉縣北十五里開涑水渠自聞喜引涑水下入臨晉遷代州都督永徽二年坐房遺愛遇害

蔣儼常州義興人貞觀中使高麗守節不屈拜朝散大夫高宗時累遷蒲州刺史蒲州戶產殷劇訴扞積年不平前刺史多不稱職儼下車未幾令行禁止稱爲良牧以老致仕永淳中復起封義興縣子以太子詹事致仕卒贈禮部尚書

徐有功國子博士文遠孫舉明經累輔蒲州司法參軍襲東莞縣男爲政寬仁不行杖罰吏人感其恩信遞相約曰若犯徐司法杖者衆必斥罰之由是人爭用命終於代滿不戮一人延載元年歷遷司刑丞司刑少卿獨存平恕前後濟活者數十百家時人比漢于張轉司僕少卿卒贈司刑卿中宗贈越州刺史

楊元琰號州閩鄉人姿儀甚偉以器局見稱載初中爲晉蒲二州刺史歷荆府長史累降璽書褒美以右羽林將軍與誅張易之封弘農郡公睿宗初遷刑部尚書改封魏國公致仕卒謚曰忠

閩鄉楊元琰仕至刑部尚書封魏國公永樂楊元琰仕號州司戶叅軍以貴妃父晉封雖同出華陰居又相近而不

可不辨

楊冲昌號州人以河陽尉對策明皇擢第一授蒲州法曹叅軍累遷孝義令鸞降庭樹太守蕭恕表其政

裴寬絳州聞喜人舉拔萃歷蒲州刺史久早入境輒雨開元二十九年除太原尹賜紫金魚袋元宗賦詩餞之曰德比嶽雲布心同汾水清終禮部尚書贈太子太傅

陸象先蘇州吳縣人元方子制科高第景雲中同平章事先天中封兗國公歷遷河中尹六年廢河中府復名蒲州象先爲刺史仍爲河東道按察使小吏嘗犯罪但示語而遣之錄事白例當杖象先曰人情相去不遠此豈不解吾言若必須行杖卽當自汝始錄事慙懼而退象先嘗謂人曰天下本無事庸人擾之爲煩耳但澄其源則亦何憂不簡

所至政如一人吏咸懷思之按察使停入歷太子少保卒
贈尚書左丞相謚曰文貞

畢構字隆澤河南偃師人第進士開元初爲蒲州刺史時州
人衛大經有行義隱居不仕構謂解縣令孔慎言曰衛生
德厚宜有旌異古人式干木之間禮賢故也慎言造大經
門就謁之構累進戶部尚書改詹事卒謚景

韋抗京兆萬年人安石從父兄子舉明經開元中蒲州刺史
歷拜刑部尚書掌吏部選事歷職以清儉自守不務生業
及卒喪事殆不能給特給柩車謚曰貞

齊澣字洗心定州義豐人第進士釋褐蒲州司法叅軍有父
子連坐論死者澣曰條落則本枯奈何俱死議貸其父太
守不聽固爭卒原歷遷吏部侍郎後爲李林甫所惡廢歸

天寶五載起爲平陽太守以黃老清靜爲治卒於官肅宗
時贈禮部尚書

李尚隱萬年人舉明經爲蒲州刺史有浮屠懷照自言母夢
日入懷生已鏤石著驗聞人馮待徵助實其言尚隱劾妖
妄詔流懷照播州累遷御史大夫卒謚貞尚隱三入御史
府輒繩惡吏素議歸重

趙驊字雲卿鄧州穰人開元中進士天寶中爲河東丞採訪
使韋直以驊操履清直雅推敬之表爲賓佐驊性孝弟敦
交道雖艱危不改其操天寶中語行義者必稱之歷秘書
少監卒

李麟濬子天寶十四載七月以國子祭酒出爲河東太守河
東道採訪使爲政清簡吏民稱之其年冬祿山變以將軍

呂崇賁代還尋同平章事晉封褒國公卒謚曰德

裴千鈞字孝卿天寶末爲萬泉令賜紫金魚袋千鈞好賓客聞人奉親有乏甘旨者輒分財贍之有德政碑

蔣將明常州義興人天寶末辟河中使府以計佐其帥全并潞等州後被拘佯狂以免虢王巨引致幕府歷集賢殿學士卒

趙復永樂尉至德二年賊將崔乾祐守潼關郭子儀大破之時復與河東司戶韓旻司士徐炅宗子李藏鋒等在蒲州密謀俟王師至爲內應及子儀至復等斬賊守陴者開門納子儀乾祐奔

李模襄邑王神符曾孫至德中爲猗氏令史思明陷洛陽賊帥掠諸縣模率衆拒之稍遷黔中觀察使終太子賓客卒

謚敬

房琯字次律河南人融子天寶十五載拜同平章事肅宗初自請將兵誅寇孽詔加持節招討西京兼防禦蒲潼兩關兵馬節度等使坐賀蘭進明譖貶上元元年四月出爲晉州刺史八月改漢州卒贈太尉唐儒多言琯德器有王佐才云

杜君幾爲河東太守開置學宮親執經教授士皆奮發自是河東多儒者後封豐樂公

唐昇爲河東縣令大歷七年褒昇階朝散大夫更留二年旌善政也

王翊太原人大曆中爲河中少尹克節度留後悍將凌正橫暴擾軍政約其徒夜譟斬關以逐翊有告者翊縮夜漏數

刻以差其期賊驚不敢發而遁擒正誅之軍城又安歷汾州刺史建中二年拜振武軍使後爲東畿防禦使卒謚肅李承趙郡高邑人建中二年七月拜河中尹河中晉絳都防禦觀察使九月轉襄州終湖南觀察使贈吏部尚書承從官以貞廉才術見稱於時

孔巢父字弱翁冀州人早勤文史隱徂徠山永王璘辟之潛逃不赴大曆初潞澤節度使李抱玉奏入幕府授監察御史累轉汾州刺使入再遷給事中河中陝華等州招討使尋使魏博諭田悅立田緒知軍務興元元年李懷光據河中兼御史大夫充宣慰使罷其兵授太子太保懷光素服待命巢父不止衆忿曰太尉無官矣方宣詔乃譟而合害巢父並殺中人啖守盈初巢父至懷光疑田悅死謀出巢

父故軍亂不肯救上聞震悼贈尚書左僕射謚曰忠仍詔賊平日備禮葬祭賜其家粟帛存卹之

李晟字良器洮州臨潭人以功封合川郡王累拜神策行營節度使李懷光叛詔兼河中晉絳慈隰節度使又兼京畿渭北鄜坊丹延節度招討使兵馬副元帥以復都城功拜司徒兼中書令徙王西平卒贈太師謚曰忠武

渾瑊鐵勒渾部之後居代署折衝果毅城永清及天安軍肅宗初趨行在敗虜於天德大曆中回紇侵太原破鮑防軍拜瑊都知兵馬使自石嶺關而南督諸軍掎角虜引去進單于大都護振武東受降城鎮北大都護府綏銀麟勝州節度副大使累遷尚書左僕射同中書門下平章事兼靈鹽豐夏定遠西城天德軍節度朔方邠寧振武道永平軍

奉天行營副元帥平朱泚授河中絳慈隰節度使河中同
陝號行營副元帥封咸寧郡王與李晟鈞禮平李懷光檢
校司空還屯河中吐蕃入使鎮奉天寇罷還河中貞元四
年遷邠寧進檢校司徒兼中書令十五年卒贈太帥謚曰
忠武

高郢字公楚衛州人第進士爲郭子儀朔方掌書記力救判
官張曇下徙猗氏丞李懷光奏爲從事累轉副元帥判官
檢校禮部郎中懷光將歸河中郢言西迎大駕豈非忠乎
懷光忿不聽及歸鎮又欲悉衆西時渾瑊軍孤羣帥未集
郢與李鄜誓死駐之屬懷光長子璀候郢郢諭以順逆璀
震懼流涕明年春郢與都知兵馬使呂鳴岳都虞候張延
英同謀間道上表及受密詔事洩二將立死懷光集衆將

殺郢郢抗辭無所慙隱憤氣感發觀者淚下懷光慙沮而
止諫議大夫孔巢父使河中遇害郢撫而哭之及懷光誅
李晟表其忠馬燧辟掌書記貞元末累拜同平章事罷復
授尚書左僕射致仕卒謚貞

石演芬西域人事李懷光至都將畜爲假子懷光與朱泚連
和演芬使客郢成義至行在言懷光無破賊意請罷其總
統成義走告懷光子璀懷光召演芬罵曰爾爲我子奈何
欲破吾家今日負我宜卽死演芬曰天子以公爲股肱公
以我爲腹心公負天子我何不負公且我胡人惟知事一
人不呼我爲賊死固吾分懷光使士嚮食之皆曰烈士也
德宗聞之贈兵部尚書賜其家錢三百萬斬成義於朔方
呂鳴岳河中都將張延英河中都虞候李懷光拒命與判官

高郢同謀間道上表及受密詔事洩過害

張名振事李懷光爲都將始懷光立功奉詔甚倨名振至軍門大言曰太尉見賊不擊使到不迎將反耶且安史等今皆滅族公欲何爲是資忠義士立功耳懷光召見諭以不反及引軍入咸陽又曰公不反來此何也不急攻泚收京城欲以賊誰遺懷光怒曰病狂人也使左右拉殺之

李鄴字建侯江夏人舉進士李懷光辟置幕府累擢監察御史懷光據河中鄴與母妻陷焉因紿懷光以兄病卧洛且革母欲往視懷光許可戒妻子無偕行鄴私遣之懷光欲加罪謝曰鄴籍在軍不得爲母駕奈何不使婦往懷光止不復問後與高郢刺賊虛實及所以攻取者白諸朝德宗手詔褒答懷光覺嚴兵召二人問之鄴詞氣不撓三軍爲

感動懷光不殺囚之河中平馬燧破械致禮表佐其府以言不用罷歸洛元和初爲河東節度使入爲鹽鐵轉運使後自淮南召拜門下侍郎同中書門下平章事固辭致仕卒謚曰肅

鄭元貞元十八年爲河中節度使杜確行軍司馬確卒遂繼爲節度性嚴毅有威斷時稱其能終刑部尚書

韓弘滑州匡城人貞元十五年充宣武節度副大使知節度事元和中封許國公入朝拜司徒兼中書令十五年二月以本官兼河中尹河中節度觀察等使在鎮二年乞還卒贈太尉謚曰隱

張圓字直之河南偃師人有吏才爲河中府法曹參軍攝虞鄉令有能名遂署河東從事又攝絳州事元和四年有事

適東方卒於汴友人韓愈爲作墓碣銘

李絳字深之趙郡贊皇人第進士元和中爲翰林學士烏重印縛盧從史吐突承璀牒署昭義拜中書侍郎同平章事留後絳曰澤潞據山東要害邢洛跨兩河間可制其合從今孽豎就擒方收威柄遽以偏將涖本軍綱紀大紊矣河南北諸鎮謂啗以官爵使逐其帥其肯默然哉宜以孟元陽爲澤潞而以重印節度三城兩河諸侯聞之必欣然上從之尋以足疾求免十四年檢校吏部尚書河中觀察使河中故節制而皇甫鎛惡絳薄其恩議者不直鎛得罪復召爲兵部尚書累遷檢校司空節度山南西道軍亂遇害謚曰貞絳在華州嘗請罷捕鵝戶詔并澤潞太原天威府罷之

薛廷老河中寶鼎人存誠子第進士寶曆中爲右拾遺以數直諫又忤李逢吉出爲臨晉令文宗卽位入爲殿中侍御史再遷給事中

溫德彝河中都將太和四年從溫造誅興元亂卒

楊復光閩人姓喬氏常侍楊元价養子幼以宦者侍內省慷慨負節義有籌略爲小黃門監鎮兵征討中和二年詔充天下兵馬都監押諸軍入定關輔王重榮爲東面招討使復光以兵會之七月至河中時巢寇益盛重榮憂之復光謀赦李克用徵其兵王鐸遣使奉墨詔之太原克用以兵從之及收長安復光與其子守亮守宗等身先犯難功烈居多封弘農郡公其年六月卒於河中贈觀軍容使謚忠肅號資忠輝武平難功臣復光雖黃門近幸然慷慨有大

志善撫士卒及死之日軍中慟哭累日身後平賊者多其部下故將諸假子爲節度守牧者數十人

李崇義河間王孝恭子嗣爵譙國公歷蒲州刺史蓋州大都督府長史有名終宗正卿

李巨川字下已隴右人唐初學士道元之後王重榮鎮河中辟爲掌書記時車駕在蜀重榮匡合諸藩協力誅寇軍書奏請堆案盈几巨川文思敏速翰動如飛傳之鄰藩無不聳動重榮收復功巨川之助也及重榮爲部下所害朝議罪參佐貶爲漢中掾興元楊守亮復請爲掌書記華帥韓建又命爲掌書記代建傳檄天下請助轉餉特授諫議大夫光化初朱全忠陷河中進兵潼關建遣巨川至河中見全忠指陳利害全忠聞巨川所陳心惡之判官敬翔復畏

其才高遂遇害

韓偓字致光京兆萬年人第進士佐河中幕府累拜翰林學士與崔印定策誅劉季述進承旨爲朱全忠所惡貶官南依王審知卒

楊承信字守真其先沙陀部人光遠子累官節度使檢校太師同平章事宋初加兼侍中征李筠命爲澤州西面都部署移鎮河中刻厲爲政而不苛乾德元年封趙國公二年卒蒲民表乞祠祀附

王仁鎬邢州龍崗人漢乾祐中歷昭義節度副使周世宗時鎮河中會殿中丞上官瓚使河中還言河中民多匿田租遂遣瓚按視百姓苦之多逃亡仁鎬抗論其事乃止丁繼母憂去官附

中卒

周起字萬卿淄州鄒平人第進士累官樞密直學士祀汾陰留權知河中府三遷右諫議大夫知并州召拜同知樞密院事改副使坐善寇準降秩卒謚安惠起性剛介不畏權要故所至有風烈而敷奏協宜措施得體朝政實攸賴焉數賜書褒諭

孫僅字鄰幾蔡州汝陽人少與兄何俱有名咸平進士甲科兄弟連冠貢籍時人榮之制科策復入第四等累官權知開封府授左諫議大夫知河中府晉給事中卒僅諳民政而爲治以寬云

薛顏萬泉人舉三禮中第累官河東轉運使祀汾陰徙陝西河中浮橋歲爲水所敗顏卽北岸灑上流爲支渠以殺水

怒因取渠水溉其旁田民頗利之終光祿卿

李虛已字公受建安人第進士歷官以能任職稱真宗嘗稱其儒雅循謹特遷右諫議大夫數月出知河中府召權御史中丞以工部侍郎分司卒

趙湘字巨源華州人進士甲科真宗祀汾陰爲考制度副使請如周官置土訓錄所過州縣山川與風俗好惡日上奏御從之後又以直昭文館知河中府終集賢院學士

王濟字巨川饒陽人試學士院累官有聲景德初以監察御史知河中府遼南侵上幸澶淵詔緣河斷橋梁毀船舫稽緩者論以軍法濟曰陝西有關防隔閔舳艫遠屬軍儲數萬一旦沉之可惜又搖動民心因密奏寢其事上深嘉歎遣使褒諭召拜侍御史知雜事

范仲淹字希文蘇州人舉進士高第爲秘閣校理尋通判河中府爲政仁厚惠愛及民甚溥後召拜樞密使復除叅知政事謚文正

吳育字春卿建安人試禮部第一中甲科慶曆五年拜樞密副使尋改叅知政事復改樞密副使未幾出累除宣徽南院使經畧鄜延夏人侵耕隴籍守并州欲築堡備之育謂要契未明而亟城麟府必受患移文河東又疏於朝不報旣而郭思陷太原將佐皆得罪去育求解宣徽復爲資政殿大學士尚書左丞知河中府徙河南卒謚正肅

朱選天長人仁宗初知河中府忠厚有守上稱爲長者

楊偕坊州中郡人歷知河中府時元昊反劉平石元孫皆戰沒偕馳告延州曰大兵十萬且至矣其具芻糧儲什器以

俟賊聞遂解去夏竦議增土兵偕言不便時賴其言遂至不擾

梅摯字公儀成都新繁人第進士爲侍御史言多觸貴戚同知嘉祐二年貢舉以右諫議大夫知河中府卒摯性淳靜不爲矯厲之行政跡如其爲人

趙尚寬字濟之河南人安仁子知平陽縣鄰邑有大囚十數破械夜逸殺居民將犯境尚寬趣尉出捕曰盜謂我不能來方怠惰易敗也宜急往毋使得散漫又遣徼巡兵躡其後悉獲之嘉祐中考課第一又徙知河中府神勇卒苦大校貪虐刊匿名書告變尚寬命焚之曰妄言耳衆乃安已而奏黜校分士卒隸他營官至司農卿卒詔賜錢五十萬蔣堂字希魯常州宜興人第進士仁宗時以天章閣待制發

山西通志 卷九十七
運江淮前後五年不一載物遺汴京權貴上嘉之就除河
東路都轉運使未行知洪州又以樞密直學士知河中府
以禮部侍郎致仕卒

趙瞻字大觀盩厔人仁宗時知萬泉捐圭田修學宮士自遠
而至改知夏縣作八監堂書古賢令長治跡以自鑒移知
永昌縣治平中以濮議繇侍御史出通判汾州元祐三年
擢簽書樞密院事四年同知院事卒謚懿簡

狄青西河人初隸御馬直累擢樞密副使出平儂智高復爲
樞密副使遷護國軍節度使河中尹還至汴京拜樞密使
以同平章事出判陳州卒贈中書令謚武襄

顏太初字醇之顏子四十七世孫居彭城博學有雋才第進
士爲臨晉主簿政聲焯著因事至同州葬通判宋武父子

蘇舜欽表其事於墓左後爲南京國子監說書卒

朱壽昌字康叔揚州天長人以父異蔭至知廣德軍母劉氏
異妾也方娠而出壽昌生數歲始歸母子不相見五十年
熙寧初與家人辭訣棄官入秦遂得之於同州壽昌以養
母故求通判河中府數歲母卒居喪幾喪明累官司農少
卿卒

范純仁字堯夫仲淹子第進士熙寧中知河中府元豐中復
知河中府諸路閱保甲妨農論諫甚力錄事叅軍宋儋年
暴死純仁使其子弟視喪小殮口鼻血出純仁疑其非命
按得其妾與小吏姦因會置毒鼈肉中純仁問食肉在第
幾巡曰豈有旣中毒而尚能終席者乎再訊之則儋年素
不食鼈其曰毒鼈肉者蓋妾與吏欲爲變獄張本以避死

山西通志 卷九十七
爾實儋年醉歸毒於酒而殺之遂正其罪元祐初同知樞密院事三年拜尚書右僕射兼中書侍郎明年罷踰年加觀文殿大學士知太原府其境土狹民衆惜地不葬純仁遣僚屬收無主燼骨別男女異穴塋者三千餘又推之一路塋以萬數計夏人犯境朝廷欲罪將吏純仁自引咎求貶有詔貶官一等再徙復召轉右僕射再出外入黨禁卒謚忠宣純仁嘗曰吾生平所學得之忠恕二字一生用不盡而仲淹嘗謂諸子純仁得其忠云

孫路字正甫開封人第進士司馬光用其言乃不棄河湟徽宗時歷知太原河中府卒

狄棐字輔之潭州長沙人第進士以樞密直學士知河中府有中貴人過郡言將援棐於上前棐答以他語退謂所親

曰吾湘潭一寒士今官侍從可以老而自污耶爲政愷悌不爲表襮死之日家無餘貲

潘夙字伯恭美從孫生於將家能留心邊務神宗時以直昭文館知河中府終光祿卿

楚建中字正叔洛陽人第進士知滎河縣民苦鹽稅不平建中約田多寡以爲輕重元祐中文彥博薦爲戶部侍郎不拜卒

游師雄字景叔學於張載第進士熟西事建洮州雋功紹聖中以衛尉少卿知河中府終直龍圖閣

范百祿字子功成都華陽人鎮兄子第進士累任華要多所論列元祐中拜中書侍郎罷爲資政殿學士知河中府卒孫載崑山人紹聖初爲河中府戶曹更三守皆立威嚴者載

獨與之爭持曲直不事詭隨後除河東轉運判官時稱爲循吏

字文昌齡字伯修成都雙流人第進士涖官所至有聲紹聖中知河中府後以戶部侍郎卒詔爲封傳護送官給其葬費

晁補之字無咎濟州鉅野人宗慤曾孫舉進士試開封及禮部別院皆第一徽宗初以國史編修實錄檢討官爲諫官管師仁所誣奏出知河中府修河橋以便民民畫祠其像後號歸來子卒補之蘇門四學士之一也

晁詠之字以道濟州鉅野人補之從弟舉進士又舉宏詞一時傳誦其文爲河中教授元符末應詔上書論事罷官後提點崇福宮卒

郭忠孝字立文河南人達子受易中庸於程氏第進士宣和間爲河東路提舉盜販鹽者衆止治其首餘悉寬貸宰相王黼怒之坐免靖康初命提點永興軍刑獄措置保甲忠孝得勝兵三萬遣兵趣澤潞聽宣撫司節制永興帥范致虛入援忠孝曰金人深入而河東無守備不致坐困乎願分兵走太行扼其歸路遂以蒲縣軍三千破金人于猗氏踰絳州破太平砦入平陽郭會淆澠師潰乃引還後殉永興城

王闢之臨淄人爲河東縣令吏治膚敏常慕夷齊高節乃毀淫祠作新廟祠之

郝仲連昌元人建炎初金人犯河中守臣席益遁去時仲連引兵屯河中就權府事率衆與金人力戰度不能守先自

殺其家人城陷不屈而死

蒲壽晟咸淳間知蒲州性儉約於民毫無所取建曾井汲水
二瓶置座右人頌之曰曾氏井泉千古列蒲侯心事一般
清

金

牛德昌字彥欽蔚州定安人皇統二年進士爲萬泉令屬蒲
陝薦饑羣盜充斥州縣城門晝閉德昌到官卽日開城門
縱百姓出入榜曰民苦饑寒剽掠鄉聚以偷旦夕之命甚
可憐也豈奸宄比耶能自新者概不問賊皆感激解散縣
境以安府尹王伯龍嘉之禮待甚厚累官太原尹卒贈中
奉大夫

李愈絳州正平人正隆間詞賦進士歷武定節度西京留守

憲臺廉察皆最改知河中府事

馬伯祿字天錫三河人幼志學事繼母孝登大定二年詞賦
進士調武清簿歷龍水令同知北京路轉運使南京提刑
侍御史所至皆以清直能幹聞轉知河中府事卒謚忠貞
王蔚香河人大定間爲良鄉丞有卓異績超授河東北路轉
運使廉爲諸路最加知河中府
吳鑄長春人大定三年宰滎河撫民有方蝗不入境旱禱卽
雨民刻石頌之

張萬公字良輔東平東阿人幼聰悟喜讀書登正隆二年進
士第章宗初爲彰國軍節度使明昌二年拜參知政事六
年知河中府時軍興調發叢劇悉爲寬假使民力易辦人
爲繪像於薰風樓又建去思堂尋入爲平章政事封壽國

公卒謚文貞配享章宗廟庭

劉從謙字光甫以明經擢進士泰和元年任萬泉主簿寬猛適中舉錯有法嘗罄俸資以修廟學祀名宦

李復亨字仲修河津人年十八舉進士調臨晉縣主簿護送官馬入府宿逆旅有盜殺馬復亨曰不利而殺之必有讐者盡索逆旅同人過客同邑人橐中盛佩刃謂之曰刀礮馬血火燬之則刃青其人歎服果有仇遷南和令累官叅知政事兼修國史終安國軍節度使

田世英字用之河中人博學能文長於詩中興定二年經義進士與同年張瓚毛麾段繼昌齊名調絳州教授遷虞鄉主簿及尹已而退居鄉里教授生徒郡士大半出其門學者稱田先生

馮璧字叔獻正定縣人承安二年經義進士制策復優等興定四年遷刑部郎中關中旱詔與吏部侍郎畏所審理冤獄時河中帥阿虎帶及僚屬十數人皆以棄城罪當死繫同州獄待報同州官僚承望風旨問璧何以處之璧曰河中今日重地朝議擬爲駐蹕之所若失此則河南陝西有唇亡之憂以彼宗室勲貴故使鎮之平居無事竭民膏血爲浚築計一旦有警乃遽焚蕩而去此而不誅三尺法無用矣竟以無寃上之後北歸卒

把胡魯元光元年正月罷京兆行尚書省以知河中府事權安撫使時陝西西路轉運使夾谷德新上言曰臣伏見知河中府把胡魯廉直忠孝公家之利知無不爲實朝廷之良臣也去歲兵入延安胡魯遣將調兵城賴以完不爲無

功今合達買住各授世封而胡魯改知河中府切謂方今用人之時使謀畧之臣不獲展力緩急或失事機誠宜復行省之任使與承裔共守京兆令合達買住捍禦延安以藩衛河南則內外安矣不報六月召爲大司農正大元年復往陝西拜平章政事卒贈右丞相東平郡王

完顏訛可內族也時有兩訛可皆護衛出身一曰草火訛可每得賊好以草火燎之一曰板子訛可正大八年以兩訛可將兵二萬守河中九月元兵來攻十一月攻愈急軍士日夜死鬪十二月城陷草訛可戰數十合被擒爲元兵所殺板訛可率敗卒三千奪船走閩鄉杖死人謂河中城守不下德順多寃之

晁會高平人爲猗氏令丰儀奇偉器度恢宏善訓誨勤撫字

時分俸以給貧乏陞興平軍節度副使

康錫趙州人任河中府治中氣質重厚公家事知無不爲與

雷淵冀禹錫齊名

蒲察婁室猛安人舉進士知河中府事後死王事贈資德大

夫定國軍節度使謚襄勇

劉瑋字德玉咸平人舉進士特賜及第歷官戶部尚書出濟南移鎮河中府上嘗問考課法對曰考課之法本欲綜核名實今提刑司體察廉能贓濫以行賞罰亦其意也別議設法恐太繁上將擊毬武殿聞瑋卒而止謚安敏

完顏宗道本名八十上京司屬司人通周易孟子善騎射知河中府有惠政民立像於層觀以時祀之

侯小叔河東人爲河中府判官權安撫副使散家財以賞戰

士元兵圍河中急人勸小叔降之皆斬密遣經歷官張思祖潰圍出奔告於汴京明日城陷小叔死之

元

石天應字瑞之興中永德人善騎射豪爽不羈屢從木華黎大小二百餘戰常以身先士卒辛巳秋八月從木華黎征陝右假道西夏自東勝濟河南拔葭州木華黎表授金紫光祿大夫陝西河東路行臺兵馬都元帥一日謁木華黎於汾水東木華黎諭以進取之策天應還鎮召將佐謂曰河東西皆平川廣野可以駐軍規取關陝諸君以爲如何或諫曰河中雖用武之地南有潼關西有京兆皆金軍所屯且民新附其心未一守之恐貽噬臍之悔天應曰河中雖迫於二鎮實用武立功之地北接汾晉西連同華地五

千餘里戶數十萬若起漕運以通餽餉則關內可尅期而定關內既定長河以南在吾目中矣吾年垂六十老耄將至一旦臥病牀第聞後生輩立功名死不瞑目矣男兒要當死戰陣以報國是吾志也秋九月遂移軍河中旣而金軍果潛入中條襲河中天應知之先移驍將吳澤伏兵要路澤勇而嗜酒是夕方醉臥林中金兵由閒道已直抵城下時兵燼後守具未完新附者爭縋而去敵乘隙入天應見火舉知敵已入奮身角戰左右從者四十餘騎皆曰吳澤誤我或勸西渡河天應曰先時人諫我南遷吾違衆而來此事急棄去是不武也縱太師不罪我何面目以見同列乎今日唯死而已汝等勉之少頃敵兵四合天應飲血力戰至日午死之木華黎聞而痛惜焉初天應死事時弟

天禹子佐中在軍中伺敵少懈倒抽其斧反斫之突城而出趨木華黎行營求得蒙古軍數千回與敵戰敗之木華黎嘉其勇奏授金符行元帥子安琬襲後授大同等處萬戶張匡衍木華黎行錄天應聞中條山賊侯七侯八欲夜襲其城卽遣部將吳權甫領兵出潛道左權甫醉失期故城陷天應遇害此可徵木華黎之深倚天應也名臣事畧羣盜燒居民府舍遁以天應子幹可代領其衆

李守賢字才叔大寧義州人金大安初暨兄廷植弟守正守忠歸欵命守忠爲都元帥守河東朝廷以全晉爲要害之地非守賢鎮撫之不可遷河東南路兵馬都總管旣至河東人皆曰吾等可恃以生矣戊子加金紫光祿大夫知平陽府事兼本路兵馬都總管庚寅太宗南伐道平陽見田

野不治以問守賢對曰民貧窘乏耕具致然詔給牛萬頭仍徙關中生口墾地河東辛卯平陽當移粟萬石輸雲中守賢奏百姓疲敝不任輓載上嘉納之時河中未下守賢建言以爲將士逗留沮撓多所傷溺臣請自北面鑿城先登如其言城果下遂構浮橋明年繇蒲津南濟潼關二月大破趙雄兵於芮城甲午卒

姚思聰字達夫進士泰定二年知萬泉縣歷任清自治有能聲所至政平訟理有蝗不入境之異

石正卿泰定四年宰萬泉政尚廉平獄無冤濫後秩滿遷正平尹人爲立石頌德

不古魯反字守道至正間爲萬泉令民紀其政績於碑祀名宦

胡元真字幹卿知萬泉縣秉性剛直守節清苦豪猾畏威奸諛喪氣有修學記

楊不花河西寧夏人朶兒只子以蔭補官歷僉河東廉訪司事嘗出按部民有殺子以誣怨者獄成不花讞之曰以十歲兒受十一創且彼以斧殺怨必盡其力何創痕之淺反不入膚耶遂得其情平反出之河東民饑先捐貲以賑請未得命卽發公廩繼之民賴不死天曆初除通政院判將行值陝西諸軍拒路不花獨率衆出禦呼西人諭之曰民者祖宗艱難所致國家大事何與於民汝等旣昧逆順又欲殘此無辜吾有爲民死爾不汝從也陣潰遂見殺二僕亦見執曰吾主旣爲國死吾縱爲人奴今苟得生他日何以見吾主於地下欲起殺讐讐要斬之至順二年贈嘉議

大夫禮部尚書以褒其忠

劉天孚字裕民大名人由中書驛史累官知河中府視事始兩月陝西行省丞相阿思罕舉兵至河中天孚日夜治戰守具選丁壯分守要害阿思罕歛船濟兵遂入城以扼河渡鎖舟楫爲天孚罪欲脅使附已天孚佩刀直前衆遏之不得進退謂幕僚王從善等曰吾家本微賤荷朝命至此今不幸遭大變吾何忍從之而負上恩哉且與其辱於阿思罕之手吾寧蹈河以死遂拂衣出時天寒河水方堅天孚拔取佩刀斫冰開北望爲國語若祝謝者再拜已脫衣帽岸泚投水中阿思罕籍其家郡人咸哀痛之事平詔其弟天惠給驛以歸其柩贈推誠秉節功臣中奉大夫河東山西道宣慰使護軍彭城郡侯謚忠毅

靳克忠字唐臣潞州人知河中府期年政事修舉西賊猖亂
克忠以忠義自勉誓死禦賊或勸少避其鋒曰吾守臣也
去將安之城陷公服坐廳事執至也先帖木兒前抗論不
屈遂遇害封郡公

八扎海牙畏兀人自和州轉河中府達魯花赤陝西行臺御
史也先帖木兒叛軍河西岸海牙與知府靳克忠極力捍
禦相拒旬日統軍者宵遁賊遂自大慶關渡河被執不屈
死於奉元省門之外

護廩實至正間知河中府蒞政二載聲譽籍甚呂憂去後為
河東運使惠愛尤多民為立碑紀之

董輔卿河中人至正間知猗氏縣田賦徭役任編氓社戶自
相推派行之以公民稱便焉未期政平訟理民為立碑

月輪失帖木兒萬泉令通經重道公廉有為嘗請免賦以濟
民饑民為立石頌德

明

康茂才字壽卿蘄州人嘗為都水營田使修水利興屯田洪
武元年從經畧中原留守陝州規運饋餉造浮橋渡師鎮
河中撫綏瘡痍民立石頌德招來絳解二州扼潼關秦兵
不敢東陝西平移鎮山西卒追封蘄國公謚武義子鐸以
父功封蘄春侯卒子淵幼未襲授散騎舍人已而革冠服
勒居山西遂不得嗣弘治末錄茂才後為世襲千戶

汪德洪武初任萬泉縣知縣廉敏有肆應材當開國初悉心
興舉久之規模乃立祀名宦

徐政湖廣大冶人洪武三年任蒲州知州愷悌慈祥民服其

化當兵火後翕然有熙皞遺意祀名宦

邵童西和人洪武八年以舉人任蒲州同知恭謹守法上官累旌異之祀名宦

季錫字天祿咸寧人永樂戊子解元授蒲州學正毅然以師道自居教人立身制行皆以身先之出其門者多成令器陞給事中

何福全陝西鳳翔人宣德間以吏員任萬泉縣縣丞充勸農官省耕耘察紡績雖風雨不倦廉潔自矢有二婦夜織一偶出其一問曰晴乎曰晴如何爺蓋名動婦孺如此累官叅政祀名宦

張廉山東泰安人正統初任蒲州州判擢本州知州政務實惠不市虛聲嘗以憂去職民盧靜等以千金賻拒不受相

率走闕下乞留命仍治州事課吏讀律教民耕織無牛種木棉者爲之勸借修學宮舜廟及河海神祠平反冤獄尋致仕去民肖像祀之

盧祥字仲和東莞人正統間進士官吏科給事中以言事謫蒲州州判幼多技能年三十後始習舉業官諫垣疏糾大臣王文項文曜姦惡及爲州佐慷慨就任勤其職不懈曰吾素位而行也天順初召爲禮科都給事中累官延綏巡撫

崔明直隸新城人成化間以舉人知萬泉縣慈惠精明鋤奸剔蠹興學育才治行爲一時最邑有冤死者以蝴蝶辨其獄罪人立得螟蟲生將害稼爲禱於神鴉食之殆盡民有幼子爲狼噬訖於明次日狼忽自斃因以示之當時稱爲

五奇絳州陶叅議銓有碑記其事

毛鳳來河南西平人成化間以進士任臨晉縣知縣冲年入仕民多易之值甲辰大饑盡發倉粟以賑又募富民出貨百姓賴以存活時盜賊蠡起乘機劫掠鳳來嚴禁四捕立磔諸市盜尋息

蔡晟睢州人成化間任蒲州老成平易下民稱頌以憂去

馬遜臨清人成化間任榮河政多恤民修祠著績陞太原通判

張安陝西環縣人成化間繼毛鳳來知臨晉縣時凶荒雖脫力田無具流離者觀望不能歸且該年稅糧催徵如故安極力請免民獲漸甦與毛令並歌咏之

許鵬字雲程直隸山陽縣人由舉人任四川邛州成化二十

三年補蒲州政績優異撫按請行旌勸詔賜誥命及其父母重修學宮創建書院有碑記

胡昂字文謙直隸正定縣人弘治初以進士知蒲州蒞政嚴明吏民畏服捐俸修城視公如家去任日行李蕭然州人醵金為贖力却之後過郡士民攀留延欸至不忍別

潘林新野人弘治初蒲州同知幹理公勤剖決精審卒於官民哭奠久而不忘

高騰臨潁人弘治間任榮河修廢舉墜訟平政理民深懷焉徐誼長山人弘治十一年以貢生任猗氏縣知縣清潔不妄取遇事必審求其當而剔奸釐弊尤以才幹稱擢靈州知州祀名宦

馬綸直隸神武衛人正德五年以舉人任猗氏縣知縣剛毅

執法無所私然仁厚不苛畏威者亦懷德擢臨清知州祀
名宦

王大節直隸大名人嘉靖元年以舉人任萬泉縣知縣性嚴
明不寬假豪猾民得樂業邑西門外有土橋歲久傾圯涉
者病之大節悉力規畫易之以石因名以永利又以其餘
修又西之永安長橋臥波迄今稱便

王懋陝西咸寧人嘉靖六年以御史謫萬泉縣典史立朝有
大節降今官能以慈惠著尤好崇獎士類政暇輒授經諸
生嘗以民艱於水鑿池畜之在今崇德街號曰惠民擢長
垣知縣累官懷慶知府

張讓山東諸城人嘉靖八年以進士任滎河縣知縣清直不
與時諧因解組歸士民涕泣遮留後官南太僕寺丞祀名

宦

孫恪河南信陽人嘉靖十四年以舉人任臨晉縣知縣清癯
美容儀爲人豈弟慈祥值歲旱齋戒步禱家人恐其羸止
之弗聽澍雨遍境內尋以疾卒

張舜臣山東章邱人嘉靖二十年以進士任臨晉縣知縣儀
容修整揚休山立與人言笑不苟勸勵學校刊輯縣志擢
吏部主事累遷戶部尚書

邢綸陝西南鄭人嘉靖二十二年以舉人任猗氏縣知縣仁
慈有清操善折獄不喜鈎距而悉得其情間徵贖緩輒貯
倉庾中值凶荒卽用以賑救尤優禮文士扶持誘掖俾克
成立後五十年猶得稱善地者皆綸力也累官柳州知府
張佳印字肖甫四川銅梁人由進士以禮部郎中謫河南陳

州同知嘉靖四十一年陞知蒲州時地震未久賦不時供委曲拊循而國賦亦不廢工吟咏善書所歷名勝題咏殆遍陞潁川道河南僉使歷官太子太保兵部尚書謚襄憲范文原直隸定興人嘉靖四十五年以選貢任萬泉縣知縣水蘖自矢遇所當爲則毅然不撓嘗修背城以固疆圉平街道以利往來又雅善形家言於北門外建文昌廟復於廟東北建臺護之今稱范公臺擢永平府同知

侯祁鄆城人嘉靖間自深澤縣調任滎河承地震後能經理籌畫選兵飭武禁暴安民一切營繕修復如制且以興文爲已任建大寧書院設師儒其中時親誨之

宋訓河南新蔡人隆慶元年以進士任蒲州知州廉幹有爲築州城創鼓樓修河中書院所興舉悉關百年大計累官

通政司叅議

李廷棟直隸涑水人隆慶三年以舉人任萬泉縣知縣興學校正風俗均稅糧革驛馬民被實惠而修葺古城復薛通之舊使敵騎不獲馳騁厥功尤偉

齊君問偃師人嘉靖間任猗氏爲政以德讓風厲尤雅意古文公餘輒親出郊規度田畝品格山原以爲催徵緩急豪猾無所容其奸

王欽安定人清修苦節事繼母以孝聞隆慶間任萬泉鋤強抑惡有聲三晉邑人紀其嘉績畫十二圖將內召以疾歸史邦直號正庵山東樂陵人隆慶間以進士知臨晉縣有吏才數微行境內田廬里居皆能識其處邑軍民雜處軍故驕恣不用命捕者臨所屯輒稱官司凌親藩邦直曰夫非

食吾之士者耶且若有王胡不衛若王而越千里以屯食於我而我法之玩乃急草諸戍橫絕請徙他方狀旦暮躬持檄上屯生員胡某者聞之懼丐學校諸生請命邦直曰惟吾法是聽吾貫汝胡生唯唯應命於是屯軍人人爭就約束乃按籍定戶積戶成屯屯立一頭諸屯有事事立一大管丁隸戶戶隸屯而屯隸之大管事月朔大管事赴縣畫卯具有無違犯報官官復覈一二強暴者寘之法無不凜凜奉縣官命惟謹三載考滿量移西安府丞累遷河東按察司僉事督理鳳陽屯牧致仕卒於家

王毓陽陝西綏德州人萬曆三年以進士任臨晉縣知縣凡前令史邦直規制悉遵守之弗失間有未合者稍稍變通故治不勞而聲稱遠毓陽先任靜樂至是以廉能調臨晉

云

何允升河南杞縣人萬曆三年以進士任猗氏縣知縣時當承平上恬下熙奸弊叢生允升殫力釐剔撫善良鋤奸俠崇學校繩豪貴恩義兼至時稱其體備四時擢知蒲州仍卯翼邑人不替後入爲兵部員外卒於官囊止數金不能具棺斂事聞給葬以歸

趙岸陝西藍屋人萬曆九年以進士任臨晉縣知縣廉明善斷雖大獄案件不移時輒具百姓歡呼稱無冤鄰邑質成者踵相接值歲旱禱雨四野霑足尋以勞卒祀名宦

陳經濟號衡吾禹州人萬曆十三年由進士除猗氏令性澹泊沉毅力爲地方謀生養丙戌歲大饑經濟借鏹上官並捐俸設粥廠活人無算所携銀帶一束拆以糊口堂下槐

角甚繁得豆數石與縣尉分啖之達官輜軒迂徑不入邑會邊儲告訕部使者嚴督繫經承吏經濟曰官實不才吏乎何尤乃奪索自繫使者駭去解州七郎堰護城堤也延二十里州守請於上官起十縣夫築之經濟曰城堤非鹽堤可比奈何徵役各縣乎弗應州守關提不已詣解見守爭之乃罷至今猗無七郎堰工皆經濟力也

吳崇禮山東寧陽人萬曆十五年以進士知蒲縣調劇臨晉邑北地廣人稀拋荒者衆崇禮置官莊具牛種召集流亡今其莊名曰吳家莊任滿擢監察御史

高惟岡陝西神木人萬曆二十六年以進士任臨晉縣知縣修舉廢墜自縣治學宮城垣一切聿新又於蛾眉頂築文星臺下建文昌閣以聚風氣祀名宦

李景登廣寧進士萬曆間任猗氏才敏氣恬不以崖岸自異爲政務持大體請除荒地課業諸生陞吏部主事

白宗舜清澗舉人萬曆間知蒲州蒲素多豪右宗舜一介不取禁絕干謁嚴革諸弊猾吏畏服

勇慎霸州舉人萬曆間任蒲州居官五載不輕言笑案無留贖刑政有關大犯者權勢不能奪

郭九有涇陽進士萬曆間任猗氏操嚴冰霜發奸懲暴凜不可犯丁憂歸服闕再補猗氏邑人鼓舞歡迎駢填道路始終不易其操陞禮部主事

許侗直隸高陽人崇禎初以舉人任萬泉縣知縣自守廉潔愛民以誠於奸弊所在澄清務盡尋調夏縣祀名宦

朱之馮字樂三大興人天啟五年進士崇禎中爲河東副使

所部鄰秦豫寇警日至大猾朱全宇潛通秦賊令廢將謝
鳴進執殺之部內以寧晉宣府巡撫狗節

黃光煒羅山人崇禎二年以舉人任猗氏縣教諭立期課藝
輒具酒肴勞之賢才奮起科第甲一時擢知吉州甲申闖
寇過河陷州城將立偽官州民願得光煒光煒微服遠遁
莫知所終

李昌齡咸寧人崇禎十二年由舉人除猗氏令關西馮從吾
門下士也潛心理道砥行直方下車卽誓於神曰負所學
者天厭之革火耗絕私餽鉏弊洞姦胥徒凜凜講學勸農
於學宮禋祀尤爲加忒製樂器習舞容勒圖於石俾永爲
遵守尋以不嫻於俗解仕去邑人至今慕之

閔自寅浙江烏程人崇禎十三年以舉人任臨晉縣知縣能

不畏權要不愛功名以行其志屬河內大饑朝廷多事中
原流寇充斥窮民幾欲揭竿自寅蒿目時艱多方補捄故
民雖流離死亡而卒無怨叛者陞常州府同知

李樹聲岐山人知猗氏縣廉靜不擾有德及人丁內艱不復
仕逆闖僭號樹聲曰吾家六世受國恩今安往乎卽夕呼
天而逝

張斗河南溫縣人崇禎間以選貢任萬泉縣知縣嚴肅有才
能流寇侵境督吏民禦之寇不敢犯尋調趙城後擢大同
府同知

王樞徵安陽人舉於鄉歷官蒲州知州忤豪宗謝事歸十七
年二月爲賊執不食死

國朝

林天擎字玉礎奉天蓋州衛人順治二年以貢生知蒲州招集流亡俾村墟炊烟相屬寬城內宣平二里夫役俾無困於供億安插滿兵尤有幹畧兵民胥頌之後累官南贛巡撫

錢法裕遼東籍浙江仁和人順治三年任蒲州知州才敏心恕政舉而民不擾姜逆之亂城陷被執不屈死

贈布政司叅議

賜祭葬祀忠烈祠

陳素抱鐵嶺人順治三年知猗氏縣陳蠻子脅衆爲亂衆請討之素抱曰愚而詐人必不附其敗可立俟也何討爲已而果爲鄉勇所殺衆皆驚服迨姜逆之變陝督孟喬芳統兵來勦時素抱業遷潼關兵備道矣伺制府渡河哀懇曰

猗氏某舊治民必不與賊爲亂卽或爲所脅亦日夜望掇援若玉石不分恐非軍門安民至意因請以子佩從行渡河佩馳至猗號召士民迎王師制府慰勞甚至令軍中無得入猗境猗民至今頌之

許嗣興奉天開原人康熙十一年任蒲州知州葺廟學復河中書院治豪猾爲民受害者胥斂迹時檄民運米西安屢詳請運至陝界止獲允客兵往返胥懼伏不敢肆民德之後歷官福建巡撫祀名宦

陶自悅字艾圃江南武進人康熙三十四年以進士知猗氏縣自悅性淳厚深於經學涖政寬以字羸弱嚴以治豪猾有循吏風雅工制義得荆川震川法日進邑中知名士口授指畫諄復不少倦猗氏故多英雋得自悅倡導彌粹厲

奮躍一時科第甲山右久之遷澤州知州治澤如猗氏澤人之感頌也亦如猗氏嘗輯州志指要精覈在武功吉水二志間後以病請告歸

陳騰章廣西賀縣舉人初任浙江新城令康熙五十三年補猗氏令慈惠廉平簡靜不擾時用師哈密軍需車仗鞍屨口袋等項催檄旁午騰章設法備辦不責於里甲民胥德之後卒於官貧不能葬賴同官資助越二年始克歸里

遼州

周

趙奢趙之田部吏也收租稅而平原君家不肯出奢以法治之殺其用事者九人平原君將殺奢奢因說曰君於趙爲貴公子今縱君家而不奉公則法削法削則國弱國弱則

諸侯加兵諸侯加兵是無趙也君安得有此富乎以君之貴奉公如法則上下平上下平則國彊國彊則趙固而君爲貴戚豈輕於天下耶平原君以爲賢言於王王用之治國賦國賦大平民富而府庫實秦伐韓軍於闕與廉頗樂乘言難救王召問奢對曰其道險狹譬之猶兩鼠鬪於穴中將勇者勝王乃令奢將救之兵去邯鄲三十里令軍中曰有以軍事諫者死秦軍軍武安西鼓譟勒兵武安屋瓦盡振軍中候有一人言急救武安立斬之堅壁留二十八日不行復益增壘秦間來入奢善食而遣之間以報秦將秦將大喜奢旣遣秦間乃卷甲而趨之二日一夜至今善射者去闕與五十里而軍軍壘成秦人聞之悉甲而至軍士許歷請以軍事諫奢曰納之歷曰秦人不意趙師至此

山西通志 卷九十一
其來氣盛將軍必厚集其陣以待之不然必敗奢曰請受
令歷曰請就鈇鎖之誅奢曰胥後令歷復請諫曰先據北
山上者勝後至者敗奢卽發萬人趨之秦兵後至爭山不
得上奢縱兵擊大破之秦軍解而走遂解闕與之圍賜號
爲馬服君以歷爲國尉奢於是與廉頗藺相如同位

唐

高君狀齊州人引大義諫齊王祐祐擊擒之愧其言不能殺
祐敗詔擢榆社令

呂義忠河東監軍朝廷詔王逢王元達討楊弁義忠聞之卽
日召榆社本道兵誅弁以聞

宋

馬仁瑀大名夏津人從周世宗征高平師不利仁瑀控弦躍

馬挺身出陣遂敗之世宗至上黨諸將坐失律誅者七十
餘人擢仁瑀爲弓箭直控鶴指揮使宋初從征澤潞又以
功領常州防禦使開寶四年遷瀛州防禦使威名尤著太
平興國初移知遼州四年征太原命分兵攻城遷朔州觀
察使判瀛州事七年卒贈節度

安守忠字信臣陽曲人開寶五年知遼州民有陰召并寇謀
內應者事泄悉斬以徇九年征太原與孫晏宣由遼州入
旣而與路羅砦監押馬繼恩會兵入賊境燔砦四十餘獲
牛羊數千太平興國初移知靈州守忠謹慤淡泊爲治簡
靜所至藩郡樂施予豐宴犒故時論與之太祖征太原多
與謀議而人罕知云

臧丙字夢壽大名人太平興國初進士平晉陽以丙爲右贊

善大夫知遼州丙素剛果有吏幹會同年生馮汝士知石州與監軍不協一夕剗刃於腹而死丙上言汝士死非自殺乞按治上遣鞠之召丙問狀丙曰汝士居牧守之任不聞有私罪若冤死不明不加宿直者以罪今後書生不能治邊郡矣上嘉其直改著作郎後充河東轉運使兼本路營田使終右諫議大夫

劉渙以諫官劾劉太后左遷典遼州治行卓異

李宏知遼州宣撫使韓絳築囉兀砦調三十萬夫遼州最窮僻上戶猶配夫四百三十四僦直計三千緡下者十六人直十萬輦運經二十二驛民多破產上下莫敢言宏能約民力所勝而餽不失期以訴其實令鞫罪御史裏行范育使河東請貸被劾官吏從之

范育字巽之邠州三水人祥子第進士神宗時爲監察御史裏行使河東論韓絳築囉兀二砦始調外郡稍遠邊城前後三十萬夫宣撫使不先告期轉運使臨時督辦致民皆破產獨遼守李宏能約民力所勝而餽不失期顧以訴其實翻令鞫罪願貸被劾官吏其芻糧在道者隨所至受之使已困之民咸蒙德澤從之後知河中府終戶部侍郎

金

移刺子敬字同文遼五院人父拔魯天祚西走留督輜重已而輜重被掠乃自髡逃於山林子敬讀書好學除同知遼州事舊本廳自有占地歲入數百貫州官歲取其課地主以爲例未嘗請辯子敬曰已有公田何爲更取民田竟不取秩滿郡人請留於行臺省不許大定時爲諫議大夫上

山西通志 卷九十七
幸西京州縣官入見猛安謀克不得隨班子敬奏軍民一體合令猛安謀克隨入見上嘉納之於是責讓宣徽院及端午朝會詔依子敬奏行之子敬言山後禁獵地太廣有妨百姓耕墾上用其言遂以四外獵地與民後自簽書樞密院事出爲河中尹河中地熱上恐子敬不耐暑改與中尹致仕卒

馬克禮漢馬援後知和順縣事德惠及民君子謂不忝其先有德政碑

呂宗禮性穎悟有才辯行業過人天會九年詔郡邑設吏員鄉里以宗禮謹愨推試吏事擢律科進士第一權遼州事充河州知法權防禦判官轉文林郎遼州司候判官卒祀名宦

柴庭明昌七年爲武畧將軍充遼州司戶飛騎尉有治行禱雨輒應

楊伯元開封人初爲榆次令有惠政以憂去起遼州刺史政績益著

郭文振字拯之太原人承安二年進士累官遼州刺史貞祐四年昭義節度使必蘭阿魯帶請升遼州爲節鎮廷議遼州城郭人戶不稱節鎮而文振有功當遷乃以本官充宣差從宜都提控文振治遼州深得衆心興定三年行河東北路元帥府事刺史從宜如故招降太原東山二百餘村得壯士七千人十月與張開合堅臺州兵復取太原四年詔升樂平縣爲臯州壽陽縣西張寨爲晉州從文振之請也又言武夫悍卒乞行帥府擅請便宜乞分遣公廉官徧

詣訪察而澤潞等處芻糧猶廣人民猶衆乞選重臣復置
行省皆聽節制時澤潞已詔張開規畫不能盡用文振言
但令南京兵馬使朮甲賽也行帥府於懷孟而已是歲封
晉陽公河東北路皆隸焉文振奏孟州每以豪猾不逞之
人攝行州事朝廷重於更代就令主之去年伯德和攝刺
史提控伯德安殺之奪其職河東行省以陳景璠代安安
內不能平因誣告景璠死罪朝廷未及按問安輒逐之恥
受臣節制宣言於衆待道路稍通當受恒山公節制今正
定已不守安猶向慕不已臣徵兵諸郡安輒詭辭不遣臣
若興師是自生一敵非國家之便也聞安有女臣輒違律
令爲姪孫述娶之安遂見許臣非願與安爲姻爲公家計
屑就之耳自結親以來安頗循率以從王事法不當娶而

輒娶之敢以此罪爲請宣宗嘉其意遣近臣慰喻焉又乞
選官安集武仙境土從之五年奏臣所統嵐管隩石寧化
保德諸州境土濶遠不能周知利害恐誤軍國大計伏見
葭州刺古里甲蒲察智勇過人深悉河東事勢乞令行元
帥府事或爲本路兵馬都總管與臣分治擇便地處之仍
受文振節制上黨張開以厚賞招文振將士頗有亡歸者
詔分遼潞粟賑太原饑民開不與文振奏其事詔遣使慰
喻焉復請蒲察分治嵐管以西諸州從之又請分上黨粟
以贍太原詔文振與開計度頃之詔以石州隸晉陽公府
元光元年請遣行元帥府惟良還林州不許又上書乞遣
前平章政事胥鼎行省河北諸公府帥府並聽節制不報
二年詔應援史詠復河東是歲遼州不能守徙其軍於衛

州

元

李僎絳州人至元六年任榆社令直諒廉明篤信和易務德化不恃刑威二年夏大旱禱於廣靈王崔府君廟暴身烈日中朝夕拜懇越四日雨衣履盡濕拜祝猶未已四境沾足歲大熟邑人立石頌焉

王天祐上黨人至元十五年任榆社令興學勸農政教兼舉士民戴德焉

秦松齡大德間任榆社尹天資篤實為政寬平

諳都刺字瑞芝凱烈氏通經成宗時除遼州達魯花赤以政聞賜上尊名幣除集賢直學士後遷襄陽路達魯花赤山西大饑河南行省恐流民入境為變檄守武關諳都刺驗

良民輒聽度關吏曰得毋違上命乎諳都刺曰吾防奸耳非讐良民可不開其生路耶又煮粥以食之活數萬人

許有壬字可用居湯陰延祐二年進士授同知遼州事會關中有警鄰州聽州民出避棄孩嬰滿道有壬獨率弓箭手閉城門以守卒獲無虞州有追逮不許胥隸足跡至村疇唯給信牌令執里役者呼之民安而事集右族貪虐者懲之冤獄雖有成案皆平反而責其罪州遂大治六年己未遷山北廉訪司經歷

張欽祖至正間知和順縣事鼎新學校譽重當時

梁宇初為榆社丞歷任趙城汾西太原徐溝擊強治奸廉能有聲治行為諸縣最

明

周至善洪武間任榆社縣知縣均賦役停訟獄能公能勤上下稱之祀名宦

石亨陝西鳳翔人永樂中知遼州為政仁恕民有去思碑

段浩齊河人宣德中知遼州為政公直民甚悅之

劉和金谿人正統間舉人任遼州學正以春秋教授諸生晝夜不倦一時成就者最多士子春秋之學至今宗之

祁誠灤縣人正統間知遼州為政勤儉深得民心每朔望詣學為諸生講書史亶亶不倦祀名宦

黃鉞舒城人景泰間以舉人知遼州聰明果斷蒞政克勤修學校舉百廢士民思慕不忘祀名宦

羅綱餘姚人天順間以舉人知遼州威惠並施加意學校公暇即課試諸生祀名宦

連盛永年人成化間以進士知和順縣蒞政公勤吏民畏懷

陞御史

陳鎰臨清人成化間以舉人知遼州秉性剛毅鋤強去暴盜賊屏跡吏畏民悅祀名宦

楊和固安人成化間遼州學正厚重博學教誨謹嚴士子畏威懷德稱儒林第一

于璧字良玉新城人由進士任知縣擢監察御史立朝不避權要弘治二年左遷遼州州判越一年士民詣京祈知本州百廢俱舉於學校尤加意數百年來科第蟬聯皆培植力也陞苑馬寺卿

陳賢順天人弘治間遼州訓導教士有方士多從之祀名宦
党傑固城縣舉人榆社教諭以成就後學為心講易課文情

同父子陞知縣行取御史士子思之不忘

高貫江陰人初為刑部郎中正德中以忤劉瑾謫知遼州誠心愛民暇則課文藝士林頌之

楊惠洛陽人正德間以舉人知遼州置學田修公署養士愛民善詩文纂修州志

王寵平度州人正德間以舉人知榆社縣慈祥愷悌刑不嚴而民畏政不猛而事集蒞任七載人樂其業陞鳳陽通判

祀名宦

梁如京薊州人嘉靖間以舉人知榆社縣一清如水發摘如神以憂去清風兩袖行李蕭然

高思敬陝西人嘉靖間以舉人知和順縣清廉仁愛有循吏風崇祀名宦

楊魁儀封人嘉靖間以舉人知和順縣持身清介行政仁慈士民稱頌祀名宦

張秦新鄉人嘉靖間以舉人知遼州玉潔冰清愛民如子去之日老幼莫不悲號

劉漢完縣人嘉靖間以舉人知榆社縣性耿介門無私謁風教所被民雖貧不甘為盜尤加惠庠序士勃然興起崇祀名宦

康朴長安人嘉靖間以舉人知榆社縣丰采溫和襟懷慈惠勸農興學薄斂省刑民立祠祀之

董槃涉縣人嘉靖間以監生知榆社縣負揮霍才復勵精為治流賊犯境守禦有方卒保無虞

季文察遼州同知進所著樂書四種部覆多前人所未發得

合依永和聲之旨詔授太常寺典簿

許應達嘉興人隆慶間以進士知遼州清廉持已慈愛臨民

樊自新陝西人隆慶間以貢知和順縣廉介律已平易近民

祀名宦

李朝綱隆慶間以貢任和順教諭純篤不浮誨人唯本忠孝

祀名宦

張正儒新安人萬曆間以舉人知和順縣廉明果斷豪猾屏

跡祀名宦

萬象新宜興人萬曆間以舉人知和順縣合里併甲薄賦輕

徭祀名宦

張儒枝江人萬曆間以貢知和順縣愷悌慈愛視民如子祀

名宦

朱進忠桐栢人萬曆間以貢任榆社縣撫字有方民立石建

祠

岳惟華曲周人萬曆間以進士知遼州申免漂沒地糧士民

感頌不衰

李繼元寧夏人萬曆間以貢知和順縣修城垣賑災荒暇則

閉閣纂縣志士民依之祀名宦

雍學詩閩中人萬曆間以貢知榆社縣自奉淡泊勤於治賑

濟有方所活以萬計致政歸當道給勘合資路費民甚思

之

吳永圖韓城人萬曆間以舉人知榆社縣緝盜賊申鄉約課

士勸農恤孤拯弱嘗辨吳子誠冤反曹封野獄發徐貞女

誣一時稱為青天審編里役獨宿公所集里老戶甲詳定

上下民以爲允遷晉府審理輿論惜之

冀孟會上蔡人萬曆間以吏員授榆社縣丞潔已愛民捐逋賦減額糧課紡織勤樹藝凡有便於民無不畢舉陞階州同知民擁留不忍舍建祠祀之

李嘉會鄆城人崇禎間以貢知榆社縣端方有守吏才明決政務寬仁常以化誨平兩造之情有循吏風

杜佇靜海人崇禎間以貢知榆社縣爲政得寬猛之宜視國如家士民勒石頌德

馮道亨寧靜人貢生知榆社縣臨民以寬尤善育材人立祠祀之

李卑字侍平榆林人崇禎中累官孤山副總兵陝賊多流入山西詔卑及賀人龍各率部卒千隸宣大總督張宗衡麾

下會王自用陷遼州聞官兵至棄城去六年春諸軍入城多殺良民冒功卑獨嚴戢其下無所擾已敗賊於陽城賊入濟源山中又敗之於天井關移討河北賊晉總兵官七年卒贈右都督卑所至軍民安堵當倉卒鎮靜如常李呈章信陽州人崇禎中知遼州五年紫金梁來寇拒守力屈城陷死之

曾淑尼江南人崇禎間以吏員任遼州吏目流寇破州城淑尼以未僚慷慨自矢殉死難之義

胡景化南鄭人崇禎間任榆社典史時流寇肆毒景化守禦不懈邑賴以全民立石建祠

沁州

周

樂霄魏獻子分羊舌之田爲七邑三命霄爲銅鞮大夫孔子聞獻子舉霄曰遠不失舉可謂義矣

北魏

韋崇字洪基京兆杜陵人寓居河洛高祖納其女爲充華嬪除南潁川太守不好發摘細事郡中大治頻居中正以平直見稱出爲鄉郡太守更滿應代吏民詣闕乞留復延三年在郡凡九年轉司徒諮議久之卒

唐

孟神慶華州華陰人永徽初沁州刺史以清介著名

裴行立稷山人守貞曾孫以軍勞累授沁州刺史遷衛尉少卿口陳願治民試一縣除河東令寬猛時當歷安南都護卒贈右散騎常侍

王思禮高麗人以戰功遷兵部尚書霍國公兼沁州節度使思禮善守多積儲持法嚴整人不敢犯故多戰功保全境土

唐漢賓莒公儉之苗裔也會昌間昭義節度劉從諫署爲武鄉令從諫卒子稹拒命漢賓固諫不從舉族見害昭義平敕贈武鄉令

後唐

李存賢許州人本姓王太祖養爲子遷沁州刺史先時沁州當敵衝徙其南百餘里據險立柵而居至存賢爲刺史曰徙城避敵豈勇者所爲乃復城故州梁兵屢攻之存賢力自拒守卒不能近遷武州刺史山北團練使又遷慈州天祐十八年梁兵攻朱友謙於河中莊宗遣存賢援之是時

河中食少人心多疑謀者曰河中人欲殺子以歸梁宜亟去存賢曰死王事吾志也復何恨哉卒擊走梁兵後爲盧龍軍節度使卒

郭饒沁州綿上人以驍勇數立軍功爲沁州刺史者九年爲政有惠愛州人思之

宋

解暉洺州臨洺人隸兵籍戍雁門與遼人接戰斬七級獲酋一人以功遷奉國軍隊長周廣順初從王峻援晉州率敢死士三千餘夜入遼師帳擊之殺獲甚衆宋初從征澤州力戰目中流矢師還策勲爲內外馬步軍副都軍頭右第二軍都指揮使乾德六年詔領部軍屯上黨從李繼勲畧太原開寶九年破太原軍於境上斬千餘級獲馬三十匹

太平興國二年詔於潞州北亂柳石圍中築城置威勝軍以暉爲軍使從征并州先下隆州賜予有加復令與石彥贇督戰士隸城西行營劉繼元降以太原宮女三人賜之俄以功遷本州團練使雍熙初充雲應寰朔忻代等州都巡檢使三年代歸終右千牛衛大將軍暉頻立戰功金創徧體時稱驍將

曹光實雅州百丈人太平興國四年征河東知威勝軍事令調軍食光實願提一旅奮銳先登上曰資糧事重亦足宣力也河東平命爲汾遼石沁都巡檢使五年與潘美分道出雁門爲前鋒遇敵迎擊敗之斬數千級優詔褒獎後爲李繼遷誘害贈賻加等

王仲寶字器之密州高密人以捕賊功累徙澤潞晉絳慈隰

威勝軍巡檢使至官才八日獲太行山宿賊八十人賜金帛緡錢終左屯衛大將軍致仕卒

金

王特起崞縣人進士太和中爲正定錄事叅軍有惠政改沁源令愛民禮士去後人思之崇祀名宦

禹顯代州人以戰功授義勝軍節度使兼沁州招撫使元光初元兵攻河東顯扼龍猪谷擊破其衆擒元帥韓光國俘獲甚衆後守襄垣與元兵戰於玉女寨大捷以內變城陷被擒不屈而死

李完字全道朔州馬邑人經童出身復登詞賦進士第以任澄城主簿廉遷定襄令世宗嘗選能吏八人按行天下完其一也後任河間府治中提刑司言完習法律有治劇才

陞沁州刺史仍以璽書褒諭承安中卒完長於吏治所至姦惡屏迹民皆便之

楊潤襄垣人金末同知沁南節度使銅鞮令城陷死難

元

趙全平陽襄陵人氣宇英邁有膽智金末羣盜起挈家據綿山之陽日從數百人事射獵元太祖南下率衆歸附從國舅下正定洛磁銅臺諸郡以功擢副元帥安撫沁州治績用成卒於官

陳思濟字濟民柘成人以才器見稱世祖卽位建省部俾掌敷奏姚樞許衡皆器重之剛直守正不附權要至元五年拜監察御史劾阿合馬不法帝命廷臣正之思濟厲聲曰御史言官也非爲辨訟拂袖而出知沁州簡要不務苛察

遷簽河南江北等處行中書省事卒年七十贈吏部尚書
謚文肅

張德鄰字友仁壺關人至元間任沁源尹履正奉公不避權
勢除煩苛抑貪鄙武鄉民孫元住以疑盜繫獄援引至數
十人上官屬德鄰按問委曲推究元住獲平反議者咸服
其明綿營戍卒擾民以法繩之莫敢犯涖任三年盜息民
安受代之日吏民嘆息爲立去思碑聖裔孔克方有記崇
祀名宦

杜豐爲沁州長官十餘年寬徭薄賦勸課農桑民以富足請
老卒沁州人立祠祀之

廉答失蠻中山人監生久客江淮得性理之學至正初擢武
鄉尹居官行政皆本平日所學鋤強扶弱有不吐不如之

屈去任邑民思之爲立遺愛碑崇祀名宦

李唐臣武鄉人至正六年任本縣尹秉公守正值久旱痛自
刻責遂大雨四郊霑足歲稔嘉禾生有一本六穗之異崇
祀名宦

張綱武鄉人至正間任本縣尹政教兼施威愛並用嘗謂僚
倅曰牧民者有恤民心恤民言心恤者民信言恤者民疑
時妖氛爲患綱諭以大義遠近不惑崇祀名宦

明

邵善高郵州人洪武六年任沁源令首建縣治公廨修立學
校招集士類陞工部郎中

鄺孟珏興山人洪武間由人才知沁源勸農興學均平賦役
陞左督府斷事

呂昭字克明江南崑山人永樂間沁州知州先以薦授徐州訓導上書言事蒙嘉納改浦城縣丞陞今官貧不能治裝浦城人醵金贈之卻弗受至徐州天甚寒猶衣單衣前受業弟子爲製一裘賃蹇驢泣沁益著廉謹子旦舉進士貽書戒之勉其以廉自守言甚厲沁人至今思之

高亮灤州人天順初由舉人知武鄉縣常巡阡陌課農桑省民疾苦道遇田婦饁耕者亮取視之皆糠粃藜藿亮流涕曰民窮如此牧民者之罪也後入覲民爭餽贐儀亮一無所受

張玘霸州人成化間以監知沁州勸課農桑作興學校流民多歸復及代百姓赴闕奏留增秩復知州事

席勤學邠州人成化間以進士知沁州真心愛民奏減田賦

若干隆禮學校課藝惟勤卒於官民咸哀之

白惟勤字勉之清澗人以舉人知沁州加意撫循獄訟尤能明察時有婦暮行賊豔其首飾以沙撲面適一人突至挾之婦目眇無從辯識賊誣挾者爲劫弗能決惟勤密函蒼頭於箱置二囚側令二囚自相許悉得其情比再鞠賊猶執詞如初惟勤啟箱出蒼頭證之賊驚服挾者獲免時稱爲神明陞衛輝府同知

許英寧陽人成化間以歲貢知武鄉興學校勸農桑均徭役清詞訟流民復業者千餘家鄉里有盜馬者畏其威復返其主民立德政碑

李彥成磁州人弘治間沁州訓導正其楷模篤於訓迪士多有造彬彬向風

山西通志 卷九十七
高璉醴泉人弘治中由舉人任武鄉縣常誦前人言曰催科不擾是催科中撫字刑罰無私是刑罰中教化父老至今頌之

曾暹吉水人由舉人任沁州學正明經博史以善誨聞陞國子監助教

馬圖林縣人正德間以舉人知沁州省賦除繁潔已愛下祀名宦

王崇慶直隸開州人正德間以進士官主事上疏忤旨謫沁州州判高才邃學名山勝蹟所在嘯咏尋入爲部曹擢分巡冀南道駐汾州惟正風俗敦士習是務嘗毀懸元宮爲子夏祠撒靜心寺爲察院後以母老請歸累官南京吏部尚書

馮繼祖興平人正德末以舉人知沁源縣增修城池撫弱除強有能吏風

路永聰漢陰人由解州判官陞沁州同知有文名居官以循良著稱

李雄留守衛人由舉人任沁州學正深明經義勤於講解文風丕變

黃義漢陰人沁州訓導訓誨不倦持身不苟士人宗之

齊聞道鄜州人由舉人任武鄉教諭布衣蔬食貧苦自勵振作人文科名蔚起陞黎城知縣岢嵐知州以清節著聞

劉遷高陵人嘉靖中由舉人任武鄉縣涖政惟勤宅心以恕嘗修南城甫底績遇北兵至全城無虞民懽然曰微劉使君吾儕盡罹鋒刃矣益敬愛如父母云

賈德潤雞澤人嘉靖間以舉人任沁源縣知縣性嚴重遇事英敏嘗勸民輸粟實倉廩備不虞敵兵闌入抵縣境先期斂人畜城中指授方畧督士民固守城獲保全張廷槐字子徵萬全都司人初以進士任兵科給事中遇事敢言不避權貴左遷婺源縣丞擢知沁源縣爲政持大體念地僻民貧賦役煩重請弛不急之務徵調之令悉報罷公餘興學課士甄拔賢才修學宮闢射圃行冠禮正風俗與文翁比烈累官按察司副使

俞汝爲字毅夫江南華亭人萬曆間以進士官山東僉事左遷沁州知州汝爲敷歷郡縣威望素著涖州事招流移重學校術者言漳水徑南下於州不利州不能蓄衆豐財以此遂築石渠使東流汾州改府後割沁及屬邑隸之民疲

於奔命爲上疏闕下復舊制沁陽驛舊設募夫爲民累建議革之嘗修州志稱精核在沁五年擢工部去沁人立祠祀之

史應元萬曆間知沁州清勤仁恕剔蠹惠民善政甚多士民尸祝之祀名宦

干木靜海人萬曆間以舉人知沁源縣清儉安靜未幾乞休歸

黃元會寧夏中衛人萬曆間以貢知武鄉縣催科不擾編審無私開荒田招流移勤樹藝教紡織修學育才築堤捍患在任九載士民德之建生詞勒其事於石

靳賢字子哲陝西靜寧州人萬曆五年以舉人任沁源縣釐奸剔弊吏畏民懷嘗遵例履畝定稅減三分之一縣城舊

係土築每歲傾圯申請當道甃以磚石爲生民豎百年保障陞潞安府通判岢嵐州知州乞休去沁人立生祠祀焉侯體乾歸德人萬曆間以貢知沁源縣文學操守胥爲當時推重居官勸化風俗表揚節義裁省里長勸課農桑嘗捐柴馬銀完窮民逋稅人尤稱之尋以母老乞休當道檄留不顧去百姓遮道扳泣如失慈母

范廷輔號鷺猗山東滋陽人崇禎四年以舉人任沁源縣性直才敏以清慎著稱時流寇猖獗因於城西紫金山建保安寨又於城外增重門嚴啟閉復勸助米豆召兵捍禦地方賴之調芮城歷陞山西守寧道沁民立祠祀焉

范禎交趾人沁州判官征剿有功陞本州知州薄賦緩刑懷遺澤者歷久不忘

孔聞讜曲阜人至聖裔崇禎間以舉人知沁源縣正直不阿清廉自矢緩征以紓民困鋤暴以格奸豪保成定亂功績甚偉民立祠祀之

余一鳳龍游人崇禎間以舉人知武鄉縣丰格修整才識敏練分較鄉闈一時號稱得人

國朝

李芳莎永年人順治元年由拔貢令武鄉清節自持發奸摘伏如神暇則以詩歌自娛地方利弊亦往往托之於詩當時以爲詩史嘗延邑中紳士開局修志進退筆削芳莎一人任之陞永州同知

劉璇永平人順治元年以貢生任沁源縣知縣沁源明季稱盜藪民多習鬪健許訟璇教以禮讓招逋撫羸著循良聲

後以鄖陽同知死吳逆之難

張一龍奉天錦州人順治六年以貢生知沁源縣姜逆之亂太行綿霍間多爲賊脅及大兵進勦主者議縣人脅從罪一龍涕泣固爭願以百口保其無他主者感動下令軍士無得妄殺縣人始獲保聚後遷郴州知州以去遮道送者趾相屬已復建祠肖像以祀焉

王國棟遼東鐵嶺衛人順治七年以貢士知沁州時姜逆亂後國棟知民疾苦履田畝覈勘得無主荒地若干沒水石荒地若干具詳撫臣白如梅

題豁糧銀七千餘兩由是民免追呼荒地以次開墾國賦仍無缺額迄今八十年沁人思之

汪宗魯江南懷寧人康熙六年以進士知沁州有清操薪水

悉自給民有訟以木爲皂率令自拘到案立剖之役人皆拱手無所事事由是修城隍飾廟學嚴保甲勸農桑懲游惰又爲設義塚建養濟院暇則進諸生命以詩文丹黃甲乙不倦涖官六年沁人迄今謳思之

李琛直隸高陽人康熙十八年以廕生知武鄉縣縣舊有飛糧爲民病琛甫受事具詳懇請豁免不允則趨會城面陳至痛哭不能止抑鬱成疾以卒縣人德之附祀明劉黃二公祠中復立專祠於姜村以祀焉

山西通志卷九十七

公師中更立專師然姜林以師誦

至誠哭不瘡也師誦如熟以卒練人

對為只誠梁甫受事具若懸諸

卒梁直隸高懸人與與十八

了不劉師官六平公人交今

謝又為焉美社數養獨親

想手無風事由由景愈如

悉自餘只商為以本為身率

令自師師案立陸之

